

國
朝
文
匯

國朝文匯甲集目錄

卷二十一

嵇永仁 號紹山江南無錫人諸生客范忠貞公幕中同

樂布論

羅舍人入直西清序

溫賢忠公忠烈傳

陸 萊 號義山浙江平湖人康熙丁未進士己未

通洋宜防倭患議

游白雲山記

九曲游記

山東平原縣知縣梧桐叔墓誌銘

贈中憲大夫遐澤金公墓誌銘

應 昇 號仙溪江西宜黃人

軍峯記

喬 萊 字子靜號石林江蘇寶應人康熙丁未進士己

未舉博學鴻詞科官翰林院侍讀有石林集

游七星巖記

十三

游伏波巖記

十三

游柳子祠記

十四

遊永州近治山水記

十四

孫文正公墓表

十四

陳

鼎

字定九江陰人
有松村叢書

滇黔紀游

十九

岑太君傳

十九

陳玉璣

字贊明號柳峯江蘇武進人康熙丁未進士官內閣中書有學文堂集

侯羸論

二十一

平勃論

二十一

熨斗厓記

二十二

惠山華孝子祠記

二十三

鹿忠節傳

二十三

簡副使傳

二十四

沈光祿傳

二十六

卓屯田傳

二十七

蔡氏傳

二十八

蒲松齡

字柳泉號留仙山東潯川人諸生

募修龍王廟序

三十

逸老園記

三十

國朝文匯

卷二十一

目錄

二

甲集
國學扶輪社印

樂布論

樂布之言曰。窮困不能辱身者。非人也。富貴不能快意者。非賢也。余以爲然。夫快意難。辱身者人辱之。快意者自快之也。有不得不辱之勢。范睢是也。當齊魏欲置之死地。折骨捐齒。置廁更溺。佯死而不敢言。恐言之速其死耳。有不可不辱之時。韓信是也。少年曰。汝能當刺我。不能出我胯下。信雖弱。何難戮一匹夫。以殺之無益。故終忍之。脫使范睢嚼血肆罵。觸其怒以死。與韓信手刃少年於市。而逮危禍。安得位至將相。爵列王侯。榮於當時。顯稱後世。報仇雪恥於轉盼間哉。然而豪傑之士。辱身者千百其間。快意者殆無一二。以卿相王侯之爵位。誠不可以操券而必得也。余嘗悲夫士之遭逢不偶。智出人下。如羊觸藩。進退維谷者矣。一時威權赫奕之徒。既糞土糞之。牛馬踐之。甚而僕妾奴隸。交相戲侮。雖或含怒積憤。忍詬匿怨。裂眦切齒。老死長阪廣谷之下。而終不獲一洩胸中之氣。可勝道哉。余是以謂辱身易。快意難也。樂布始而傭保。繼而奴。終而囚。辱之已甚。卒能拜都尉。封俞侯。豈不赫赫然大丈夫乎。然布當困阨死亡之日。誠不料其及此。乃一旦僥倖萬一。報德滅怨。以是矯語人曰。快意快意。夫何可為賢也。不知天下富貴之後。忘棄故人。忍言其情態。以德

為怨者有之。更且厚遇仇讐。博長者名。以顛倒是非者有之。此皆恩怨不明者也。能明恩怨者。行三代之直道。生則可以賢。死則可以神。不然。布有何殊。功茂德輒。使燕齊之人。俎豆之不祧。然則後世立樂公社者。其在斯歟。其在斯歟。

羅舍人入直西清序

癸卯冬。余從友人入燕。舍館之次日。聞舍人文戰不利。留長安未去。急往訪之。塵沙蔽天。寒風砭骨。夾雜牛馬間。鞦韆殿殿。心目惶惑。薄暮始叩舍人扉。見其敝帷破篋。几榻蕭條。僕多饑色。是時舍人他出。余詢其僕曰。爾主人何至是乎。此地多貴人長者。豈不能惟朝夕是謀乎。僕曰。主人素自愛。每朝懷一刺出門。至暮無所投。竟返以是潦倒羈縲。罕有知者。主人亦不求知也。余曰。夫既不求知也。蓋歸爾田廬乎。僕曰。主人慷慨離家。與主母決誓詞。謂當肘懸金印。紆朱拖紫。拜父母堂上。已而拊小主人之頂。嗚咽不能聲。遂振衣而出。挾空囊。襆被。孤身寄五千里外。今雖下第。尚喜朝廷多途用人。僕苟且就一官。邀升斗祿。免嗤於鄉里小兒。亦平夙心。君何輕言歸也。余愀然曰。今人作別妻孥。歸先計期。行先計日。擇吉治裝。醜酒祖道。戀戀不捨。短氣於房幃之中。爾主人抑何壯也。越一日。得晤舍人。舍人沽酒燕市。酣嬉淋漓。然後別去。越數日再晤。余將放舟南下。問舍人何所屬。舍人無言。但曰。東望會稽。煙樹蒼

蒼雲山漠漠。為我殷勤致之。甲辰歲秋。舍人遂得官。余乙巳春。復至都門。以酒賀之。曰。子可以上報父母。下慰妻子矣。舍人於是具述其由。而繼之感泣。余知舍人向非忘情於家也。蓋有大不得已焉。舍人尊公作宦淮南。士悅民懷。久於其職。中罹禍變。坐逮吏議。比法曹白其寃。而已狼狽不遑矣。攜家東歸。僅敝廬數椽。瘠田數畝。家人耕種力作。以為饘粥。教子弟讀書益勤。舍人慨然興起曰。余少年矜氣節。慕交游。破費兩大人資產。長為農夫以沒世。大人何賴有子哉。以故發憤而至於此也。今舍人出入金馬門。左右宰相。給天子筆札。戴星而趨。日沒而退食。凡禁密之地。大臣議事之堂。中外不得與聞者。舍人先習聞之。以視偏州下里。曲士小儒。誦通都大邑。條教號令。則轉相告語父老。以稱道新政者。其相去不既天壤哉。又見進士初作吏者。類起家縣令。始仕刑官。幾經遷次。猶不得望承明之門。躋清華之選。舍人可用是自壯矣。而猶以出身太學為憾。毋乃過歟。余與舍人垂髫同學。始讀書公路浦。舍人年十四。已補弟子員。余年十五。尚寄籬下。舍人學舞劍。興發時。染翰濡墨。狼籍几案。余好吟漢唐人詩歌樂府。及宋元詩餘小說。暇則彈碁射覆。以成嬉樂。繼而讀書。僮。塘。萬山之中。雞犬聞寂。水鄉屈折。魚稻肥美。余嘗濯足溪流。擢歌橫發。舍人入長林。豐草張弓射雉。兔鳥獸駭。然驚大笑。而返夜歸讀書。童子淪茗剝筍。動至達旦。自是余列

國朝文匯

卷二十一

二

國學扶輪社印

庠吳中。隔兩載復往會舍人於山陽。讀書鏡林署中。舍人折節好學。醞釀老成。為文宏通典瞻。期於自然中節而止。舍人素以兄禮事余。余得以猶子常拜見。母夫人曰。爾小子幼年結納。願始終不渝。窮達一致。有如古管鮑交。因各受命。唯唯。余今遠不逮舍人矣。舍人致身青雲。歲食朝廷廩祿。給錢若干。榮顯二人。光寵閭里。內擢則為部郎。外授則為郡佐。人生讀書之願。至此稍償其半。又况 聖朝用人超軼前代。於西掖近侍之臣。尤加優異。凡有殊才。皆敕禮部應春秋兩闈貢舉。登進士高第。猶歟。羅子雖致用未宏。而荷榮斯赫矣。獨恨鹿鹿如余者。四方餬口。舌耕之苦。病於夏畦。所入不足以養親。所得不足以置產。時人非之笑之。以為鬚眉長大無資身之策。有內顧之憂。缺室家之歡。絕風雲之望。舍人則曰。子時不利也。非才不售也。然則人生知己。甯多得乎哉。故於其入直也。作文以序之。

溫寶忠公忠烈傳

溫公諱璣。字寶忠。始名以介。浙之烏程人。世居戚里塘。太夫人陸氏。以苦節自幼撫之。就塾師讀書。熟東舍兒性頑黠。見公據案飲食。輒攘臂睨視曰。吾家案也。公唯唯。移七箸退就坐。兒又嗔曰。吾家坐也。公唯唯就階除。食訖無愠色。歸亦不語。母曰。吾故家貧。摧折乃其常耳。告則恐傷親心也。鄉里諸兒咸以醇謹就公。公赴縣應童子

試謁陳氏外家。衣履垢敝。僕輕之。呼曰。孰者爾。王公整襟瀟步。洋洋入就坐上。外家萌悔心。公恬不為意。舉止當禮。氣宇壯邁。後縣試置第一。外家私喜曰。窮兒能文。幾坐失佳壻矣。是歲補弟子員。冀落不能婚。太夫人窮殫晝夜為絰績。積錢完室家事。公亦出就館。歲歸持束脩。悉奉太夫人前。年五十二。積學不倦。舉崇禎丙子鄉試。是年即丁太夫人憂。哀毀盡禮。服闋。例應赴禮部試。時族兄體仁為相國秉政。朝士嫉之。公慨然曰。吾清白人。何苦坐權要。累進身而犯衆忌耶。避跡不應春官。益下帷鐙火。沈酣於先正制舉業。族人有因田屋爭。累歲不決。各推券契赴公求直。公裂券碎契投於地。曰。叔姪至親。不思引分就誼。乃效市井較量錙銖。甯不為祖宗罪人哉。族人慚愧而退。公為孝廉七載。相國致政歸。始上公車。至長安。夢閱榜無以介名。獨溫璜籍貫與已同。為之咨嗟嘆息。俄一老人拊背笑謂曰。溫璜即君也。公醒而驚愕。以為神人指使。不敢違。亟籲禮部題更今名。遂獲捷。崇禎癸未科。以二甲授推官。得徽州。偕繼配茅氏暨子女之任所。公下車。平反訟獄。得兩造情實。不喜深刻。暇時與都人士敦勵行義。講求學業。會甲申之變。流寇薄京城。懷宗皇帝侯皇后就經。掩面手刃公主。斷傷左臂。次刃貴妃。及所御者。然後擲劍悲愴。卒走煤山下。自縊殉國難。公聞報慟哭伏地曰。臣不能從死地下。忍苟活人間耶。欲伏刃死之。茅氏曰。君父大仇。

未報。徒死無益也。願公稍延性命。俯徇款人之請。因乃整頓疆宇。防遏土寇。逮清師掃蕩流氛。下江南。諸郡瓦解。公乃退居淪坑。曰。君父之仇。既報。吾今而後可以死矣。從弟以中勸之歸。公曰。吾守土臣。義當與此地為存亡。汝護持嫂氏孀。輩遠里門。毋以余為念也。弟迫嫂氏就道。嫂氏歛衽正色曰。夫死異鄉。婦歸故里。於心忍乎。夫願竭忠。婦不引節於義安乎。指天作誓。願與公殉死。一處。弟窺兄嫂激烈。勢難生還。啼噓泣涕而別。新安同官某某以功名求誘。公峻詞拒絕。被手書一紙。區分後事。攜幼子託居停方養重。徐闔戶。服朝服北面再拜。拔劔手刃茅氏。次及長女葆德。後迺自刎。頸血淋漓。濺地。因連刃手怯。破喉未死。目炯炯不閉。某帥憐而救焉。俾致醫藥。勸飲食。公擯不許進。遂以忠死於乙酉之九月二十九日。年六十一。耆民汪正本。方時照等。具棺衾成禮而殮。合殯公暨茅氏。淑人與長女葆德。復祀公於二賢祠。因公故更祠名為三賢。迄今新安歲時奉祀不衰。云。公元配陳氏。生子旨。召庠生。夫婦先公早歿。繼配茅氏。生子郊。學於田間。以承父志。季名祈。留新安。亂定。僕人護之歸。習舉業。應試。其弟以中。遇余於吳江。董孝廉闈家。含淚乞傳。余因低徊忠烈之風。不敢辭也。

通洋宜防倭患議

陸 棻

前代倭患在嘉靖間。不僅被於湖邑。即以湖邑論。倭屯清溪。不過沈氏兩宅。非有樓櫓之設。殲蹙之防。可以堅守而力拒。即如邑志所記。虛張倭勢。不過千人。而召集官兵。則有七萬三千之衆。是以七十三人。擒一人而不足。有是理哉。況父老相傳。真倭止一十八人耳。徐海以新安無賴。通洋貿易。資本蕩然。遂與其黨汪直葉麻輩。誘入倡亂。驅煽沿海貧民。聚而為寇。吳越財賦之區。承平既久。民間累世不睹干戈。豈能單衣而扞鋒刃。至於汎師水哨。皆同兒戲。調至客兵土兵。不諳川原形勢。而且先有几肉居民之心。無異於賊將不識兵。兵不識伍。宜乎曠日糜餉。縱賊流毒於數郡數十縣之間。釀成東南一大害也。而其原不過起於通洋貿易之徐海一人。甚矣通洋之利小而害大。利在下而害在上。不可不預為之憂也。或曰。氓之蚩蚩。鮮不謀利。通洋亦生財之一途。貿易者什伯其羣。皆挾貨求贏。以自贍其父母妻子。安得人人徐海。是大不然。凡人之有恒產與恒業者。守墳墓。樂廬肆。有田者供租稅。有丁者供力役。皆良民也。即逐末而從事於商賈。南走閩粵。北走燕秦。遠者至於滇池遼海。而止亦足以權子母而收息倍蓰矣。何至泛不測之淵。入鯨鯢蛟蜃之窟。以求贏餘。此其人必素行無賴者也。必生計涼薄。不豐於商賈之貨者也。必嗜利忘禍。貪狠而不仁。

僥倖於一獲者也。必斷梗其身。視其父母妻子如路人者也。通洋之徒。本非良善。而往來數數。玩易波濤。又聞日本風俗。出入佩弓。男女雜沓。飲食之費。倍於中國。妓館博家。比比而是。貿易者。本少利多。又素性狼藉。不自惜其資。即所獲不甚饒。而挾妓呼盧。同胥及溺。是以贏餘之財。得於彼。仍失於彼。或至盡喪其所有。如向之徐海輩。嗟乎。夫人而嗜利忘禍。輕其身。路視其父母妻子。貪狼不仁。試不測之險。以僥倖一旦之獲。則亦何事不可為。且涉大海如衽席。習見夫獷悍佩弓之俗。浮浪倏忽。若鳥獸之聚散。不以故國鄉井為念。久相忘於法制禁令之嚴。又且喪其所有。窮困無歸。更何所不為。而尚有忌憚哉。彼徐海者。始不過一通洋貿易之人。非素有不軌之志。樂與鳥倭為伍。逞其邪謀。入寇內地。祇因貪利而進。喪其所有。窮困無歸。乃激而為盜耳。而謂凡今之人。通洋貿易。必無若徐海輩者。疇敢信耶。或又以為倭俗饒於貨財。未嘗闖入為盜。此亦不可恃也。良楛共產。易地皆然。中國嗜利忘禍之人。可以聚類而往。則彼中桀黠者流。交相煽誘。亦可以因導而來。向所云真倭一十八人者。非其故轍耶。然則戢亂於既熾。弭亂於未萌。利害較然。可見廟堂之上。遠而未周。身任封疆者。不宜宴然而處堂也。封疆大吏。周而未悉。各任濱海民社之寄者。不宜忽焚如之災。而待焦頭爛額之客也。康熙初年。以海島游魂未滅。沿海防兵。糜餉日久。立

界遷民禁及採捕議者或謂損魚鹽之利絕貧民衣食之原然不出數年投誠者接踵海氛遂息以所損之利較所省之餉果孰贏而孰訕耶寇在海中不能自耕而食必資內地之粟以為生濱海奸民受其白銀聚米於家剋日相濟反以被掠報官官日夕惟盜是諱而何暇詰其奸食不貲寇不消自遷界禁棧粒米不得入於海而海寇悉為安插之編戶此計之最得效之已收者也海寇既弭朝廷乃下寬大之詔復其遷界許令結筏捕魚可以厚民之生矣而言利者遂進通商貿易充裕國課之謀於是洋禁大開富家巨室爭造貨船游手惰民競充販客微貲所挾倍息相期往而獲利則貪進而肯休苟失其資則流蕩而不能返或負豪門重息之債或親戚義助之財負者莫償索者逾迫相迫不已至於相讐凡為此者皆所謂素行無賴嗜利忘禍忍蹈不測之險而路視其父母妻子者也其情其勢不易驅而為徐海輩哉夫開洋之利稱貸於豪富者羨餘於持權者侵蝕於胥吏者各取什之三其歸於國課僅什之一而已下取其九上取其一利無幾也數傳之後承平相習脫有不虞如嘉靖間故患則徵兵調餉費數十倍悉所入之課而不償而黔黎有殘害之厄地方多蹂躪之禍所謂利小而害大利在下而害在上不大彰明較著哉愚謂封疆大吏能直陳利害破羣情而罷其役但許濱海細民結筏捕魚凡通洋船隻一切禁之則

內地之奸謀無自生海外之邪釁無由召。此上策也。否則顯立條約。檄諭所屬。有司察覈地方。通洋貿易之人。照山海關例。報明姓氏居止。編為一冊。冊內註明某人於某年某月某日。置買某貨。向某海口登某戶船。逮其歸也。又一報明而注之冊。取其里長兩鄰結狀。其隻身無賴。資本不足者。不得偕往。則來去可稽。虧盈可驗。放蕩之心。有所顧畏。而奸慝之志。未敢萌芽。雖非永安長治之良規。或亦防患詰奸之中策。然而杞人之憂。終未能已也。

游白雲山記

客有為予述白雲之勝者。曰：此廣州城北之鎮山也。抱城而居。有負辰之勢。馬岡阜綿邈。嶺壑聳秀。松竹楓棉之屬。交柯疊陰。鬱鬱葱葱。仙宇梵宮。七十餘所。歲之七月二十五日。傳為安期生飛昇之日。無少長貴賤男女。羣聚而嬉。綺羅成帷。車騎如雲。誠都會之勝觀也。今不可復覩矣。然而風景雖殊。山川無異。登臨之事。客情之所不能廢也。時惟仲春。下浣之二日。積陰初煦。寒燠適均。約同志者。循廣州之西郊。迤邐以北。於微陽淡靄間。望城中越秀山。林木叢鬱。越王臺對峙於外。龍煙障霧。足未遠乎城郭。而瀟然有巖谷之興矣。過三元里。往者兩藩攻城。結壘於此。今其地邨落成聚。而塚壘相望。得無有憑弔而生悲者乎。北行十餘里。乃際山麓。石逕蜿蜒而上。約

二十餘丈。轉而西為景泰寺。上下二字。宇各三楹。塗墍茨茨矣。丹雘未逮也。僧出茗飲。稍坐返。舊逕陟高岡。約三里許。越白雲寺。先到安期巖。巖構小屋六間。懸崖倚石。壁牖東南向。中一室。設安期先生像。椽棟之上。扁額無餘隙。越人祈嗣於先生者有驗也。下俯崇岡。遠眺大海。一山之境。此為最勝。巖峭起十餘丈。其頂銳外而覆下。即先生飛昇石也。輿人謀午食。因尋舊逕以北。歷重草。踰石梁。竹聲脩脩。緣於崖間。渡略約。入白雲寺。此則山之正峯焉。珠江環流。渺若襟帶。戈船百數。歷歷若點石。五羊百萬戶。伏處其下。而煙靄浮蒙。難以指數。遙望虎門山。亦茫然不可辨也。寺前後二字。宇各五楹。垣後有九龍井。形圓可三十圍。水深可六七尺。井以外石甃。方池纔寬尺餘。水藻鮮碧。魚鰕泳游可愛。然寺初建未久。井以上灌莽不可登。求所謂白雲洞。宋潛溪所撰白雲師碑。皆無有也。出寺望安期巖。則隱於岡下不可見。見籃輿在草徑傍。乃直南趨捷徑。徑殊陡。不易下。踰石澗。復入巖間。屋出所攜酒核小酌。遂乘輿而南。度一嶺。殊峻。約三四里。東下為水簾洞。徑陡絕。俯視心悸。兩僕上下相掖。若猿飲接臂而後下。巖下一僧結廬獨居。仰視巖石。巉坑崖窞。屹屹作崩墜狀。客難久留也。過此徑漸坦。緣淺澗東北行。叩竹扉而入。為濂泉庵。其主僧則向所遇於景泰寺者也。花石幽清。可以坐息。室內有伍鍊山先生絕句一幅。吟咏數過。如見故人。流連久

之興而南約二里許復折而北至蒲澗寺古塔結蔭廣數百武歷階而登左壁有石刻蘇長公詩門內為正殿殿後為禪堂堂之左為客座座牖北向蒼松修竹垂綠於高崖木棉如丹交錯其中叢桂清芬襲人衣袂堂之右為地藏殿殿前為寢室為茶寮為香積廚雖非叢林雄剎而氣象甲於白雲矣僧德著清雅有林下風謂予曰昔兩藩攻城積軍儲於寺寺故不致毀焉山門之西即蒲澗泉泉之上有亭一區為遊人宴樂之所茂林交映山鳥時鳴於此流觴修禊應不減山陰之蘭亭也於是聚坐於澗之濱劇談暢飲盡酒而止爰戒歸塗則已在羊城之東郊矣此游也自西而東延袤二十餘里踰越巖窞攀陟艱阻極登頓之勞歷荒廢之區乃始出而臻乎蒲澗故快然也倘出自東郊以遵蒲澗從而之水簾洞安期巖未有不苦其艱阻荒廢疲頓而返者其於白雲景泰孰過而問焉凡近乎城郭之山恒不能盡幽奇之致駭尋常之觀故必林木蒼鬱樓閣連屬使游人入其中應接不暇而後可以擅名於宇內蓋天與之以境猶藉人力以成之也茲山固有綿邈聳秀之勝矣而古木見伐新林未深古剎盡毀新宇斯葺所以游陟者不免動蒼涼之感而乏驚炫之心也然有石可憩有泉可酌相與訪仙靈之遺跡攬海若之滄然亦足以盡一日之游觀稱客中之樂事矣同游者錫山朱司馬晉白王明府漢三朱子子蓉沈子行可表兄譚戈文

及予共六人而漢三攜酒果肴核為東道主人云。

九曲游記

自建甯鷄心灘西行四日入崇安境至雙門灘一峯昂首迎於前舟人曰此獅子峯也入新橋橋圯石柱猶存折而北過溪口登岸老樟夾徑有大可二三百圍者真數千年物也循樹逕西行見溪山一覽坊入而北扁曰昇真元化洞天古楠列植修挺可三十丈石橋方池左有龍井正殿榜曰冲佑萬年宮祀三清殿後為樓樓下祀武夷君止一象所謂彭鏗二子曰武曰夷者夫吳據乎樓之後高堂寢室所以待貴游而郵傳改設仙霞軒舫罕臨香火寂如是夕宿道人虞嗣唐齋中次日遣人聞於張子幼賓而虞道人先導余出宮門展眺隔溪獅子峯橫踞於前即昨之昂首先迎者也峯後大小二巖皆以觀音名甚無謂沿溪古木陰森凌霄綠花於綠楓之上又西灌莽埋逕云是四賢祠故址即一曲書院也又西二里許入止止庵祀真人白玉蟾像相傳宋時詹美中建此以延玉蟾也綠溪東還望萬年宮正負幔亭峯若展而大王峯峙其西北儼然一巨冠故又呼紗帽峯也次日披榛東行入會真廟祀魏王子審其象張目如怒有夫人配祀中元日鄉人賽社於此也問徐真人禱雨樓圯已久循宮牆北訪宗子相祠惟一石碑臥豐草中也午餘幼賓與廣文鄭文甫偕至文

甫攜酒有相餉。邂逅快談如故相識。次日駕一艇一筏。載一竹兜。以西湖水光石鏡。字甚多。西有鐵板嶂。高與幔亭埒。若大王峯之左右翼也。望峯趾三梯。隔崖相接。新構數椽。在昇真洞上。使人飄飄乎欲凌雲也。是為一曲。稍南而西。玉女峯橫峙。漢石鏡臺峯在其前。若可坐而照。兜整峯在其西。若可挈而取。虎嘯巖蹲踞形似。又在其西。凌霄三才二峯。錯綜互列也。玉女三峯。高下肩隨。合而實分。北折南望。亭亭但見一峯。其峯北高南下。下二峯為高者所掩也。又北有小藏峯。木板十餘架於崖隙。二木如船尾狀。所謂仙船與虹橋板也。小藏峯與鐵板嶂東西相對。虹橋板亦與翰墨石相對也。是為二曲。折而西。有會仙巖。升日峯。車錢巖。上升峯。皆在溪北。折而南。為大藏峯。亦有木板如小藏然。相傳峯腰石洞。藏仙人蛻骨。可出以禱雨。今則不驗也。又南。仙船仙機二巖。即小藏之背。是為三曲。西折北向者。鷄窠巖。巖上多穴。亂草積中。似野鳥所巢。相傳羣鷄數百。狀如鷓鴣。飛棲其間。巖下有金鷄洞。相傳洞藏仙蛻。十三玉洞。下有卧龍潭。相傳許旌陽斬九蛟。宥其一。使伏於潭也。又西。李仙巖下。元時設御茶園。園內有通天井。井泉甘冽。使者暗都刺。建喊泉亭。驚蟄時致祭。鳴金鼓以喊之。製茶則泉盈。製畢則泉涸。今園不復設。泉亦不靈也。溪北南向者。小九曲。有僧結庵。築月臺可坐。雜植梅竹松桂。幽適可居也。是為四曲。西折而南。有屋角露於

峭壁之巔者。天游觀之森天閣也。稍南折而西。玉華隱屏接筍三峯。列峙於溪北。晚對天柱二峯。相對於溪南。天柱峯下。即更衣臺。相傳魏王子騫飛升處也。紫陽書院正負隱屏。有御書學達性天賜扁。按志山中講學之宇。歷宋元明。共十有六區。皆蕩廢不可踪跡。

天子崇儒重道。使紫陽書院重建特新。可云盛典。而門垣傾毀。榛莽充塗。崇安博士恐不能辭其咎也。是為五曲。由接筍西折而北。為王文成祠。又有茶洞。在諸峯峭壁之內。平曠幽邃。可以結廬。洞外石壁。錫陳幼溪雲窩贈會詩可讀。舍舟乘竹兜。循仙掌峯北行。峯色紫樾。其高際天。平若砥埴。石痕如印。數十巨掌。故名也。峯廣延一里餘。石隱路。鑿曰天游門。折而南。循仙掌背。踰鼠巖。度胡麻澗。循磴而上。為天游觀。觀南為一覽臺。臺前俯視三台峯。中高左右。攬即隱屏。玉華接筍之背也。玉華在東。與隱屏相離。隱屏接筍。自有頂踵。而勢若聯屬。登接筍者。置梯隱屏西北隅。緣仄最險者。曰鷄胸。依崖為門。架木為棧。踰之以陟乎龍脊。龍脊者。自為穹石。介兩峯間。以成徑。徑百級。僅容趾。非登臺熟察。不辨也。是日午後。雷雨大作。景象異常。雨後望東南諸峯。轉側變幻。幾不可識。而大王峯在臺之東北。傑出羣峯之表。名與實符也。將暮。文甫別去。余宿觀內小樓。未明起。觀雲海。則大霧迷漫。混沌無物。惟一臺一我。臺

側修竹數竿也。俟竹兜不至。登森天閣。東俯溪灣。指昨日舟中仰望處。昇日諸峯。皆在几席下也。午後幼賓偕道人陳晉仁。僕者朱隆俞俊輩。登接筍。余憑檻觀之。如猱之升。如蟻之附。如猿之引。如鼠之銜。既登。則穿林入室。游衍之樂。觀者不得而知也。還而詢之。陟險於峯之北。履坦於峯之南。精廬可棲。清泉可酌。茗可漱。筍可茹也。是為六曲。乘舟稍北。踰下神臯。而西折。遇上神臯。溪北有三仰峯。峯有碧霄洞。洞有丹井。相傳白玉蟾煉丹所也。是為七曲。稍南而西。有鼓樓巖。鐘樓石。皆以形似名。而鼓子巖之勝。在層峯密樹中。未易見。見者曰。筍洲數椽。構於山腰。出於林杪。可望不可即。聞有逕通小桃源。未暇尋也。溪南有煙際峯。與溪北猴藏巖相對。又西有三立峯。俗稱三教峯。余心惜之。欲易以此。三石鼎立於山頂。是為八曲。於是艤舟水次。乘竹兜。循山麓而上。窄徑崎嶇。兜步兼陟。過三立峯背。白雲出沒頂上。轉而東行。約三四里。窺寶營之隙。臨壑谷之深。隔厓樓亭。丹碧煥眼。其棟宇皆緣厓而構。厓迫以木板。擴之。人之居。不啻鳥之巢也。厓隙亦插木板。如小藏峯。亦有洞藏仙蛻。今之鼓子巖。即古之石鼓道院也。一道人。一釋子。分戶而居。午飯訖。躡茅岡嶺。而西望靈峯之雲。度邱公之巖。循間道。以臻乎白雲洞。洞僧方摘茗焙製。其棟宇亦依厓。厓視鼓子峯。廣三倍。高而實。不覺其險也。南望齊雲峯。森秀層巒。不復作巉削態。山田綠苗。交錯於壠谷。西望

星邨。瓦屋數百家。逶溪如帶。月斧洲護之。似乎別有天地。非人間也。回顧曠昔所經之奇峯怪石。若斂之筐篋。不復出以示人也。以雨阻二宿。雨歇。啟雲關出。仄迳如絙。厓石夾之。身固有所憑。然亦不敢俯視。迨磴盡。仰觀。信此身之從天而下也。乘兜里許。即向所臆舟處。是為九曲。而昔者過自九曲轉游八曲也。余興未闌。同游者告以曲盡當回舟。瞬息放溜。峯巖若失。不暇與之流連也。至下神鼻。策杖而登。有溪山第一扁。晦翁手書。地勢既卑。竹樹交密。登小樓。一無所見。出門望天游瀑布於石罅間。僅素練文餘。廢然而返。復至小九曲。向山僧買茶。茶產峯巖之上。為佳。余所至必構之。或半觔。或數兩。冀其味之有別也。欲登更衣臺。竟以雨阻。蓋向所歷皆溪北之山。憑高南望。而更衣臺在溪南。登之可以北眺。不意阻雨尤廢然也。未暮。至萬年宮。虞嗣唐治酒。與張幼賓共酌。因言九曲之峯巖厓洞。所產惟茶。羽流得以棲息。亦惟茶是給。今困於徵求。售於僧。并於富室。宮中舊有三十六房。今僅三家。岌岌乎有不可存之勢也。次日。聞道人劉虛中。鍵闌紫雲洞。得養生術。遂訪之。由止止庵西。循徑而上。可五里許。至洞口。侍者將命。延賓入。道人不出戶。啟圓牖。與客揖。相對寒暄。告余以神氣清虛。滋味淡泊為主。蓋近於理而非術也。又上至復古洞。釋子居之。佛殿新。整寮房巖閣。俱有結構。洞之上。正承仙鶴巖。巖即大王峯之西偏。峭壁無著草木。不

生壁上有鶴像如畫故名。殿之前正對昇真洞。洞在大王峯下。三梯側峙可望。幼賓偕晉仁往登焉。取徑復古洞後。朱隆亦隨之去。下一梯東向倚巖。為級三十有六。中一梯北向。植趾於崖之隅。上下四旁皆空際。為級四十餘。上一梯亦東向。僅十一級。度板以度。由中梯之杪。達上梯之趾。危尤甚。而晉仁先之。幼賓踵之。若飛鳥之翔雲者。然朱隆至中梯而止。曰。下瞰心餒也。余坐以俟。二人下。則晉仁故倚中梯之趾。作伯昏無人狀。以示余也。道人虞湛石。構室峯頂。送幼賓同下。由間道回。余與晉仁循舊徑返。烈風震雷。洶洶交集。將至止。止庵雨驟如矢。亟趨避。衣履沾濡矣。吳道人出衣履。易而燥之。雨止。迺返。則幼賓與湛石初不遇雨也。次日欲至水簾洞。上下金井。又以雨阻。閩中今歲六月前雨少。六月後雨多。游山不能盡興。亦若有限。然九曲最勝者在山水之交。余固已盡其概。又何嘗不自慊也。故記之。

山東平原縣知縣梧岡叔墓誌銘

人有隱德茂材。足以稱述於後世。而懼其見聞之不齊。傳道之弗實。一再世而遽以泯沒。是以有誌銘之作。是將以語言之際。傳其人之生平。非細故也。其言傳而後其人與之俱傳。故必學成名立。擅著作之林者。乃可任其事而不辭。宗弟淮以尊人梧岡叔之誌銘來屬。予何人斯。敢附作者而以銘吾叔。淮弟之言曰。今之大人先生。擅

著作者如林。願必有豐功偉伐。高爵顯秩。其子孫乃得造膝以請焉。先子官止一縣令。又被誣不終其官。雖有大人先生。哀其誣而欲賜之言。淮無由以請。而先子生平。又不可以沒。舍我兄其奚屬。予喟然久之。而不忍辭也。梧岡公諱費錫。字大勝。世為桐鄉人。生而穎異。甫四歲。能以黃槐丹桂屬對。讀書目數行下。博學強記。文章議論。傑然過於人。意氣慷慨。遇事能任。不屑屑為退讓。其賦性然也。年二十七。舉於鄉。因計偕十五年。乃登進士。又越九年。始謁選。知山東平原縣事。時年五十有一。莅事不滿三年。即被斥。又三年。卒於濟南客舍。享年五十有六。平原齊劇邑。前令誣誤不得去者。凡四人。公至。揖前四令曰。誠知材劣。不足以繼諸公。後然。諸公事皆我事。留諸公以冀自全。此俗吏態。余不忍為。列狀上請。盡釋四令去。而以身受其責。邑四達為逋逃藪。胥蠹蟠蝕其中。積弊浸淫。公欲一旦洗滌之。發奸摘伏。不避強禦。其所為皆人所不能為者。而形格勢禁。卒以獲謗。公與先君同鄉舉。因得敘先世。稱兄弟行。予執猶子禮事公。庚戌夏。請假歸浙。假道平原。公飲子酒。輒自嘆不免。已而慨然曰。天下事皆避其難。誰當盤根錯節者。惟內問我心無疚焉可也。公早知事之不可為。而其志堅確不移如此。夫吏治可稱。莫若兩漢。其時朝廷重親民之選。久任責成。往往不拘以文法。州刺史既多賢者。又無若後世之累卵置碁。以加於其上。故守令得

以為所欲為。然能治劇邑如周紆虞誦輩亦不多概見。而大要非文學之士所勝任也。自司馬之辨論不行。求其官稱事立。人稱官置。不可復得。如以公之才選入翰苑。從容於起居講讀之間。雖漢之枚馬。唐之燕許。不能過也。此之不遇。而老以遲暮之年。誥以邑宰之職。固已用違其才矣。累卵置碁。加於其上者。羣掣肘焉。曾不獲展布萬一。徒使受誣譏。折辱憔悴。以至於死。天之生才不易。有才或不見用於時。幸而見用。又躓於中道。而齋志以歿。嗚呼。何其酷也。公性孝友。班班可稱者。詳載淮弟行實。予謂此士君子家庭之恒修。故略之。昔王賀自言有陰德。卜其後之必昌。公治平原日。甄拔寒士。薦賢書者若而人。請蠲荒賦。至數千兩。壬子歲大祲。設法賑恤。全活飢民數千家。昌後之符。可以操左券。公之殞久淹東昌。今將歸葬於桐鄉之阜林阡。爰為銘曰。

贈中憲大夫遐澤金公墓誌銘

不華於春秋而實之。斧斯斤斯。以披其枝。其枝則披。其本不撥。謀及燕貽。閔宮有礎。儒者績學砥行。方發硌於有為之日。而時與志違。則又返而敦其根本。道其枝華。此心固已安於隱鬱。不期揚顯。而天之報施。必佑迪後人。以光大之。使隱者顯。鬱者揚。而人子歸美其親之心。用是以稍慰。此余於麻溪金氏二孤銘親之請。不忍以不文。

辭也。按狀金公諱解，字遐澤，別號蓀汀。湖其先系自趙宋仁山先生後析而為三。金華之義烏、吳江之曹邨、德清之麻溪皆同派也。麻溪始於公之七世祖諱摯者，由語溪徙居之。遂世為德清人。四傳至公之大父行，有侍御君州守君。五傳至公之伯叔行，有水部君太守君。門閭駸駸乎日大矣。公生而穎異，作文非先秦以上不取法。早歲食餼，試輒高等。時吳門雲間執文社牛耳者，爭致四方名雋以為雄，必於公屈第一。指公於昆弟行居長。丙子己卯，仲叔皆聯翩先售，公意氣不少挫。壬午舉於鄉。癸未己列房首而復落。甲申後避賊，移家入城，絕意仕進。治生產以養志。丁亥庚寅，連遭外內艱，哀毀骨立。杖而後起，服闋，咸以計偕，勸駕公喟然謝之曰：嘗奉先人訓，謂學者讀書貴識大義，家世簪纓，可昧此而覲浮榮乎？殆隱然以晉處士自命矣。聞有著作不署姓名，其避世韜晦意更高遠。此公之大節也。明末充白糧解戶，鮮不破家。孫之堅、夏新、姚鑑等皆以他業饒裕，為當事所擁持。公力言解免。孫之堅等奉千金為壽，公笑卻之。姻黨間婚喪不舉者，多方助理。了無德色。撫軍黃鳴俊慕公名，馳尺一延致武林。一再通謁，不以私干。壬癸大饑，貸錢粟者悉焚其券。生平重交友，戶外之屨常滿。蓋仲連之尚義，少林之陰行。當時之豪舉能兼而有焉。元配陸太君，唐忠宣公之裔太學生，以修公長女。世居安丘里，與麻溪接壤。年十六賦于歸，伉儷相莊。

者二十五年如一日。其事舅姑也。佐遐澤公供甘旨。必盡權。治喪葬。必盡禮。既稱未
亡人。又以母儀兼義方督課二子。朝夕無稍懈。長君丁巳舉於鄉。杭州府學教授。候
補知縣。仲君中庚子乙科。貢入成均。教習八旗子弟。令舞陽報最。升雲南蒙化府掌
印同知。尋升山東青州府知府。所以奉太君慈訓。光大遐澤公之緒者。浸昌寢熾。方
未有艾。嗟乎。遐澤公雖早世。而大節彪炳。細行克謹。為宇宙完人。可以不朽於千古。
陸太君之就養舞陽。舞陽之人。皆以祝賢令者祝壽母。其在青州。微疾偶作。太守君
即申乞終養。奉母言歸。道路觀者。無不咨嗟歎息。以為有賢母斯有孝子也。既抵舍。
則教授君又以需次旋里。築室相依。燈火相屬。太君往來兩第宅中。伯仲迭舞斑衣。
妯娌交奉盥櫛。孫曾繞膝。定省展昏。天倫之歡。壽考之福。尤人世之所罕觀者也。遐
澤公累贈中憲大夫。陸太君累封太恭人。生卒年月。詳行狀。不更贅。將以令歲嘉平
之吉。合葬於周家圩之新阡。銘曰。

立三不朽尚德。秉義遺榮。萬夫特氣。揭兩曜永無昆。坤貞厚載。方以直仁。靜而壽
理必得。山高水深。偕所藏。金鷲飛鳴。搏偃息。其福綿綿。鬱蔥色。表爾貞珉。後昆式。

軍峯記

應昇

撫屬之山稱名勝者。必曰華蓋。曰軍峯。華蓋屬崇仁。軍峯屬宜黃。為一郡諸山宗。世傳晉王郭二真人失浮邱所在。望氣華蓋得之。厥後相繼羽化去。自此華蓋軍峯。仙靈均託跡焉。蓋二山並孤峙。而軍峯尤聳峭詭特。相傳西漢長沙王吳芮駐軍此山。後得道稱贊古王。今贊古祠所祀是也。遂仍其名。或曰其形類破軍故名。二說不可考。若其巉巖截業。拔地擎空。登巔霽望。山微翠遠。飄飄然不復人間矣。其泉多飛瀑。其石突怒險巖。最奇者。有定風石。鷲頂石。其松生石罅。虬曲拙怪。雲霧往往橫半壁。上下各相陰晴。其古蹟有講經臺。有煉丹臺。有淨手池。其吐納煙霞。變幻恍惚。則有雲洞。有風洞。雷洞。其峯則有龍翔。應仙。著棋。香爐。幽遊。瑰異。賞不暇給。雖有好遊之士。青鞵竹杖。不能盡迄也。然余蓋多感矣。廬嶽之勝也。背洞庭。面彭蠡。當大江以西。建康三楚之交。舟楫所通。四方賓客所經。名人達士慕其名而至者。相屬使置軍峯。其間其感發文心。激昂志氣者。又何可勝道。惜乎介在偏隅。道里荒僻。騷人韻士。無為而止。彼望仙拜謁。半出村老野婦。祈福希冀。非有探奇覽勝之思。雖見而不解。解而不能言也。故嘗考之輿圖。及古今志遊者。多闕焉不載。坐使其名不埒於廬阜。豈非有幸有不幸耶。山之頂。構石殿其上。觀於山之半。曰混元堂。妥仙也。凡鐘磬簡籥。

之事。朝真步虛之聲。亦歷久不衰。夫以僻在荒介。為騷人韻士慕其名者所不至。而樂與村老野婦殘僧獨士。見而不能解。解而不能言者。以相周旋。當亦山靈之所自喜。而神仙孤往之士。所託跡而不棄者也。

出桂林城東門渡灘水有山七峯並峙曰七星巖土人結閣巖腹由閣門入始黑已而有光行數十步石室空明可容千人其西有洞曰棲霞入洞門巨石磅礴拾級而下燃炬入其窟若風生波起魚龍出沒者曰龍門巖東若戶牖者曰天門石紫紫垂若來禽青李梨栗荔枝之屬曰花果山峯迴岫復若鳥若洲若谿若野若煙雲變幻者曰須彌山石圓如柱高十餘丈徑丈如良工雕鏤癭攢波凌細比毛髮或曰可推而轉也曰轉輪藏石臨潭水狀如網曰銀絲網白石平布阡陌分焉清泉滄蓄其中曰仙人田其曰佛曰仙曰磬曰牀曰屏曰象曰狻猊駝虎及珍禽異卉之類皆形容肖似殆不可狀洞深四里餘將千轉其石或陂陀偃伏或斬削傾欹石筍林立乳凝沍如雪其水或細流清淺或潭深數百丈投以石久之乃有聲其運或平曠或崎嶇或偃僂以入洞窮乃明曰東方明後洞曰冷水巖泉水注石橋下洑流入江洞中多歧路皆由冷水巖出一名曾公巖宋人劉誼記曾布得巖榛莽間構長橋為遊觀地是冷水巖自布始闢也范成大曰棲霞洞多歧逕遊者畏迷途不敢進是南宋時棲霞洞尚未與冷水巖通也元人潘仁稱桂林巖洞以劉仙白龍為最似亦未窮七星巖之勝者明胡直袁襄董傳策皆有文紀其勝亦未言關於何人何年也余游者數

矣。靈蹤幽徑，詭狀殊形，非余之文所能述，聊指其略，告後之游者。

遊伏波巖記

巨石起灘江，濤高百餘丈，幾與獨秀峯等。相傳漢伏波將軍馬援載薏苡以舟中，謗者指為明珠，沈於江，因名巖曰伏波巖。洞曰還珠洞，巖石下垂一綫，不合。又名伏波巖。劉後邨詩：昔為博德祠，今乃文淵饗。是也。乃無其事而名其洞，非其祠而致其變，何哉！蓋史稱援征交趾時，所過立郡縣，治城郭，穿渠灌溉，以利其民。郝公雪海曰：粵人祀伏波，如蜀人祀諸葛，其殆有不可忘者在與？嗟乎！援之征交趾也，疔瘡癘，觸炎蒸，飛禽跣跣墮於水，是時常思馬少游之言矣。迨振旅而還，爵中私第，不亦善乎！乃垂暮之年，據鞍顧盼，再征五溪，進軍壺頭，至穿岸為室，雖僂死王事，固馬革裹屍之志，而橫被口語，遺譴怒，喪還至不敢葬，亦可哀矣。夫以援之忠，光武之聖，梁松實固，豈尚得肆其譏構如此！朱勃曰：孤立羣貴之間，旁無一言之助，又可慨也已。今粵之人追思之，立祠祀之，名其山川以憑弔之，歷數千歲不少衰，而當日之賓客故人，無敢弔者何也！洞中刻宋人詩，題名最多，隸書正夏堂三大字，范儻杜易書也。洞外多石，磯出沒水面，清流即為激越激蓄而後去。

遊柳子祠記

出永州南門涉浮橋至愚溪柳子祠在焉。遊兵斃荒圯。永之山翁溪叟伐竹木負土石爭為葺治落成而余適至。因瞻拜徘徊久之。嗟乎。瀟湘之間。凡白石清泉崇巖邃谷。皆於元次山銘柳子厚記有焉。次山刺道州。樂祁陽山水之美。名其溪曰浯溪。臺曰浯臺。亭曰唐亭。恐不為己有者。零陵山水勝祁陽。子厚與故舊書。以得移數州之地為幸。唯恐一日不去茲土也。豈其愛山水而耽遊覽。不次山若耶。范石湖之帥粵也。著虞衡志。粵山川草木禽魚。賴表揚流傳。既移帥西蜀。猶不能忘。夫粵多瘴厲風土。且不及零陵。石湖戀戀如是。豈山川風土悲者遇之而悲。喜者遇之而喜與。然則柳子騷屑不平之氣。不在風土。與柳子官司焉。非若次山為刺史。石湖為帥。有所興革以樂利其民。今祁陽不祠次山。桂林不祠石湖。而零陵祀子厚。歷千餘年不義祠圯。又新之。增壯麗焉。何也。既不似浮屠者流。為福田之說。以驚愚感眾。即流傳文章。亦非山翁溪叟之所知也。余甚感焉。豈坎壈竄逐。屈於前者。伸於後與。抑祀與不祀。有幸有不幸。亦不知其然而然與。祠外卽鉅鉗潭。鉗鉗者雙斗也。石形肖此。故名。

遊永州近治山水記

瀟水環永州城南。白石夾峙兩岸。渡水折而西。曰愚溪橋。溪水出橋下。注於瀟。乘小

舟溯溪而上源最高流最暴。砥石齒齒行里許。溪石玲砢。橫亘水面。水觸石而怒。登岸行百餘步。柳子祠在焉。巨石立溪中。類鈿鏤。曰鈿鏤潭。破絳觀柳子書。點畫可辨。渡溪折而南。又折而西。岡阜盤亘。巖壑環列。曰芝山。山有寺。藏叢叢古柏間。啟寺北。靡翠嶂垂焉。清泉懸焉。復折而東。曰朝陽巖。荒岡平曠。若無所見。級磴而下。石梁盤空。山在地中。更級而下。峭石起瀟水上。青若瑩黛。白若懸冰。洞軒豁能容百人。泉淙淙而出。注於瀟水。名流香洞。渡瀟水而北。東行。崖壑幽邃。與朝陽巖等。土人呼為賽陽朝。沿瀟水而東。曰袁家渴。複洲淺渚。迴瀾澗蓄。亂石出沒水面。水之近治可遊者如此。若柳子所記小石城石邱石渠石澗。皆沒於荒榛密菁。土人不能識焉。使余得休暇於此。躡崇崖。窮澗。瀾。剷惡木。凡名泉奇石。如石城石邱石渠石澗之類。不難搵而遇也。其沒沒而無聞者。豈不以其遭哉。

孫文正公墓表

公諱承宗。字愷陽。姓孫氏。高陽人。曾祖諱懷。祖諱遠。父諱麒。以公貴。皆贈如公。官公長身鐵面。須髯如戟。常授經易水雲中。仗劍遊塞下。從飛狐。拒馬。間直走白登。又從紇。于青波。故道南下。結納其豪傑。及戍將老卒。訪聞要害扼塞。以故曉暢邊事。萬曆三十二年。試進士第二。授翰林院編修。公在詞館中。寡交游。卻宴會。講究經濟之學。

以天下為己任。閣臣中賢者爭相引重。而公終無所附麗。四十四年。遷左春坊左中允。歷司經局洗馬。熹宗卽位。遷左庶子。充日講官。進詹事府少詹事。加禮部右侍郎。日講如故。是時。大清兵破遼陽。經略袁應泰自焚死。起熊廷弼代之。廷弼主堅壁守。與巡撫王化貞不合。兵部尚書崔景榮老御史方震孺上疏請以公代。景榮朝臣和之。要公於會極門。相率下拜。願公身任天下大計。帝未之許也。二年正月。大清兵略廣甯。未至。化貞棄城走閭陽。廷弼唾其面。不得已焚棄石屯。以西四百里。躡化貞後入關。京師一夕數驚。朝臣請用公益急。帝以公為兵部尚書兼東閣大學士。典樞務。代廷弼經略者。王在晉也。請築重關於山海關外之八里鋪。副使袁崇煥等持不可。大學士葉向高欲身往決之。公曰。某當往。加太子太保。賜蟒玉銀幣以行。公抵關。相八里鋪形勢。與在晉議不合。崇煥曰。守甯遠便在晉不可。公馳出關。望甯前險隘。乃天設重關。而覺華一島。孤懸海中。視甯遠如左右掖。然後知畫關而守者之失策也。關以東甯遠以西。凡五城。二十七堡。僅存者中前所一城。八里鋪一堡而已。遂決計收復。與在晉深論七晝夜。終不聽。公條奏凡十數疏。且面陳在晉不足任。於是召在晉為南兵部尚書。而八里鋪築城之議罷。公計朝臣中無可辦東事者。乃慷慨流涕。自請督師。帝大悅。賜尚方劍。御門臨遣。馬當是時。關兵號七萬。逃潰之餘。一營繞兵。

數十。官多至十數員。為符籍冒餉。公定兵制。立營房五人一房。三千一營。十五營為三部。將帥以營部為署。俾兵不離將。將不離帥。關城埤堦三千有奇。兵營幕布其下。置塚十八。直廬三。定城操法。又築關城南防海口。北防角山。水則從望海臺出之。麻。置巨礮為橫擊。陸則三關石城。碩萬人開突門為夜擊。北水關外峻嶺築臺十。置礮防外賊。以大將馬世龍為中部。佩平遠將軍印。駐羅城。王世欽為左部。駐角山。尤世祿為右部。駐海口。副將趙率教為前部。駐前。孫諫為後部。駐紅花店。又教演火器。嚴關支禁饋。遊龍供帳。又汰副總兵以下冗官數百員。又定總兵謁經撫儀。得具賓客禮。凡五閱月。兵民安堵。文武輯睦。商旅填咽。立六館。招天下豪傑。奇材劍客。爭摩厲求自效焉。公之建置屯。大兵山海關。練精兵於甯遠。分奇兵於覺華。蒲串。廣鹿。諸島。犒毛文龍。俾遠結鮮人。撼鎮江。檄登帥沈有容。據廣鹿。有警避之洲。急則避之海。然後用登萊兵圖四衛。南覺華兵圖四衛北。俾應分而備多。則四衛可復。復四衛以復遼。公之志也。明年二月出關。按視甯遠城。俾祖大壽司版築。是時諸將吏仍欲守關門。獨崇煥主守甯遠。公與崇煥合。以崇煥統三參將。經營甯遠。三大將更番練兵於二百里內外。甯前以西可屯田五千餘頃。督將吏買牛種耕。鑿其中。分兵護屯。屯人河東人歸者萬餘。遼人出關者又十餘萬。輪蹄相接。城堡相望。如承平時。行採

青之法不復仰給關東省度支鉅萬。又煮鹽興鼓鑄。因船以廣貿易。於是風煙頓息。中外解嚴。長安士大夫漸忘邊患。司農厭供億之繁。本兵張節制之勢。公不勝其憤。上疏劾罷戶部堂司官。又上疏言。臣以閹臣督師。凡條奏唯皇上可否。而樞臣高坐司馬堂。任意批抹。俾臣候旨。搗如疆吏。不已甚乎。以故怨者妒者。持文法議論藉藉。謂公任關撫。閹鳴秦。登撫岳和聲。及大將馬世龍為非。是會王象乾以憂去。公請罷設總督。竟不從。公言。尋甯遠城。成延表二百里。東南抵右屯。西北及錦州。東至大凌。直通閭陽。公至甯遠。遣馬世龍袁崇煥等。東巡至廣甯。抵醫無閭山。還歷十三山。陸營屯右屯。城東二十里。舟師歷三岔二家溝。別將探蓋州。尤世祿自錦州會師右屯。分兩營。哨松錦間。去甯遠幾二百里。胥會於甯遠。文武將吏相與奮臂抵掌。謂明年且大舉。公迺西巡薊昌。閱喜峯古北諸口。取道京師。會十月十四日。為萬壽節。因請入賀馬。初。楊漣之劾魏忠賢也。公聞而嘆曰。上冲幼。在奸人掌握。疏入弗覽。覽弗省也。昔進講時。時為心開。倘老臣得因奏對。極論奸邪諸狀。萬一覺悟。死不恨矣。至是魏廣微急語忠賢曰。樞輔擁關兵數萬。清君側。兵部侍郎李邦華內應。公等齎粉矣。忠賢悸甚。繞御牀哭。帝亦心動。顧東謙擬旨。以離信地。非祖宗法。責公。公疏言。薊門昌平。信地也。何離之有。而忠賢偵知。公不攜一甲士。疑稍稍釋。廣微喉。崔呈秀徐大

化李蕃。連章劾公。至比公於王敦。李懷光下九卿雜議。吏部尚書崔景榮訟言邊事非公無可任者。乃下詔切責。趙公視事。羣小謂公擁兵市重。惟削兵乃易制。且或激變。則罪公有詞。而兵科給事中李魯生汰兵之議起矣。公既視事。汰大將尤世祿。王世欽。李東誠。孫諫。汰官兵一萬七千三百餘人。省費五十六萬。公留甯遠。虛錦州。遼如右屯。自西而東。借汰兵名。為布置出關計。恐中朝之議其後也。會馬世龍遣哨將魯之甲襲大清兵。檄水將金冠等會柳河。金冠等受遼撫喻安性指。弗會。兵敗。死者四百人。之甲曰。無面目見關部矣。投河死。臺諫數十人。希忠賢指。爭論柳河事。時公留甯遠。臺諫請勒公回關門防秋。公歎曰。此召岳飛班師也。防秋豈防之關內乎。乃抗章求去。帝遂許焉。加少師兼太子太師。蔭一子。行人護送如例。公在鎮四年。復大城九堡。四十五。練精兵十一萬。立車營十二。水營五。大營二。前鋒後勁營八。沙唬船六百。進四百里。招集遼人四十餘萬。邊塞無事。莊烈帝卽位。有旨召用公。而王在晉人為兵部尚書。極論馬世龍罪狀。逮世龍下獄。又嫉臺諫詆公。沮公出。二年十月。大清兵入大安口。破遵化。將溥都城。帝乃召公守通州。詔甫下。旋有敕趣行。更下帖子召見。公踉蹌入。帝已待平臺久。勞公曰。事急矣。無備奈何。公曰。聞袁崇煥駐薊州。尤大威駐密雲。滿桂駐順義。侯世祿駐三河。皆據要害。為得策。若城守則有地可

憑其糗糧出器甲。有兵有將。臣措置不難。帝稱善。至再出世龍於獄。以守都城。屬公時漏下二十刻。公按視城牒。乘月巡壕。斬甫畢。而帝收成命。公乃從二十七騎至通州。是時崇煥中間諜語。謂大清兵之人也。乃崇煥實招致之。而吏部尚書王永光欲傾大學士錢龍錫。因傳會蜚語。御史高捷史堃者。永光黨也。捷劾崇煥。並及龍錫。有持火入倉者。堃捕得之。指崇煥家人所造。帝速崇煥下詔獄。而祖大壽何可綱憤甚。率所部萬五千人東渡。朝廷謂大壽果與大清兵合。關甯十萬眾將反。戈內向。禍在漏刻。又疑大壽據關城。則以東數十城中斷。將割以自王。公密奏大壽危疑東渡。非果有叛志。且遼將多世龍。舊部臣遣世龍往。必有解甲歸者。可勿慮。又諭大壽急上疏立功自贖。且贖崇煥罪。許代為別白。大壽得帖子大哭。諸將皆哭。報如公指。時大壽已出關。世龍追及於歡喜嶺。發步騎兵一萬五千。俾將之入援。帝命公移鎮關門。三年正月四日。大壽整兵入關謁公。甲士衛者五百人。公開誠與語。大壽喜曰。公真生我矣。公入大壽營。視壁壘部曲。言笑移晷。又時時具酒。有招大壽飲城樓。時大壽有雙望七捷。公喜曰。大壽果為我用矣。是役也。公督關甯薊昌兵。及天下入援兵。可三十萬。戰守七閱月。復建昌三屯。馬蘭松棚大安。繼復永平灤州。遷安遵化四城。及冷口瓦坡龍井潘關諸邊堡。四十有奇。前後獲九千餘級。而大壽戰功居多。邊關

甫定。言官欲追論大壽東瀆事。公密奏曰：東兵東將，偶語藉藉，且疆場方甯，遠忘血戰之功，何以服諸將心乎？事乃止。兵部尚書梁廷棟請分兵遼、劔、兩撫，而督師權遂輕遼撫耶禾嘉。大言閩部老矣，遼事我隻手可辦。又數攻馬世龍據公。公求去疏。十一上。帝不允。遣官趣視事論功。祖大壽加少傅。廢子錦衣三品世襲。公廢錦衣四品而已。以考滿加太傅。公三疏辭。帝許焉。初，大凌河之築城也，梁廷棟實主之。卹禾嘉相度稱，使命祖大壽董其役，護以石碣兵萬人。廷棟罷朝議，謂凌河荒遠，不當築。勒撫鎮回奏。禾嘉懼，揚言非己意。盡撤防兵。公謂防兵不可撤。禾嘉不聽。八月，大清兵圍凌城。禾嘉率宋偉、吳襄救凌。過於長山，襄敗績。凌城食盡，何可綱為文自祭以死。大壽從二十七騎詣大清兵營，質養子而還。公復上疏求去。帝許焉。論長山敗削世廢冠帶閑任。公為人公忠，痛國步多艱，不惜身任艱鉅，而深謀雄才，所畫輒中要領。其初督師也，熹宗臨遣，隆重持兵柄，功多而言信，雖逆奄竊政，羣小讒搆，猶得以恩禮進退。其再出也，受命於危急之際，片紙夜下，單車戒行，迨戡定禍亂，疆圉初靖，而橫抗曲排，俾左枝右梧，前跋後蹙，而後已。十一年，大清兵破高陽。公坐北城樓，勸之降，不從。遂縊死。年七十有六。從公死者，子舉人鈐、廩生鈴。尚寶司丞鑰、官生鈺。附學生鎬、孫之沅、之滂、之濠、之憲。凡之子鍊、鏘、鍊之子之澈、之漢、之泳、之澤。

璜之子之渙之瀚。太監高起潛兵至高陽。具得公死狀。治棺製一被。以檢拜而哭之。禮部以卹典請。詔復官。予祭奠。而贈陰易名之典。皆闕焉。妻王氏。贈一品夫人。惟長子銓。高苑知縣。銓子之芳。錦衣衛指揮僉事。以守官不及於難。福王南渡。謚文正。

滇黔紀游

陳鼎

古福洞深四十餘里，中有大溪水聲如雷。昔有持炬入遊者，見蒼龍偃息溪中，軒聲如雷，吼懼而返。余入游時，當冬，月水涸，溪水僅尺，遂褰裳以渡。其中景物，真天造地設。浮圖高十六級，每級三文餘，皆玲瓏有階，可登。每級俱有龕，像香爐，炬臺，皆天生成者。石鐘石鼓，擊之聲聞洞外。萬山俱響，百谷皆鳴。數十里都震動。苗人盡驚，咤奔視。次日下午，從後門出，迂道百五十里，而抵龍里。餘從者尚向於洞口蒼中馳騎，召之乃來。

龍里本衛也，後改為縣。南關外有留人洞，幽靜可愛，客至，每留戀不忍去。然淺迫，止可容數人耳。

觀音洞深五百餘里，從洞中行，東七日炬，可達都勻境。從來少人窮其穴者。明有直指方君曾盡游焉。余有好奇之癖，因具十日炬，裹一旬糧而入。初數里甚宏敞，愈入愈窄，止可容一身。若是者十餘里，乃後愈窄，側身以行者三里。三里之外，則可馳五馬，駕高軒矣。中有樓臺殿閣，人物花鳥之景，皆碧乳融成者也。至七十里，與炬四照，則無涯矣。因循石壁以行，壁之畔有泉一泓，甘香如醴，泉之畔有銅釜一，可容十升。壁上有題句云：隆慶三年錢塘方紹宗於此煮泉，筆墨淋漓，字畫遒勁，大可愛人。蓋

直指公所書也。余亦續題云。康熙十年。江陰人陳鼎亦於此煮泉。行十餘里。則不復曠蕩矣。竟行九日半。始得達後口。乃都勻府之東盡境。它麻地方。再五里。則苗樊中矣。

岑太君傳

岑太君者。明楚藩郡主也。幼好兵法。有勇婢。妾皆佩刀侍。年十五。善射。穿楊百中。又善雙劍。能飛斬人頭三十步外。然有柔德。對左右未嘗有疾言遽色。十七。工書法。有魏夫人之逸。楚藩絕愛之。留心擇配。偏顧羣下。無一當者。時楚有岑君。方冠。以騎射補營幕。忠顯極。奉帥命入府啟事。楚藩見其器宇不凡。遂以郡主字之。及流賊犯境。勢甚猖獗。太君授岑君野戰法。率壯士五百大破之。擒賊首鐵象兒。黃標。胡盧等。論功。越升副將。既而張獻忠大舉入寇。又大敗之。晉銜總戎。坐守荆南一帶。江左右得不遭賊蹂躪者。預有力也。甲申。賊復率眾大破荆湘諸郡。進圍岑君。君乃嚴督士民守禦。太君常授奇計。屢出奇兵殺賊。或親帥婢妾數百人佐戰。臨陣多所斬獲。賊眾畏之。堅守八閱月。糧絕。援兵不至。城破。值岑君大病垂斃。太君急呼家眾整頓。以帛束岑君。親負之。率署中男女五百餘人。上馬舞雙劍前導。賊見披靡。遂突圍出。賊或馳逐。卽命家人發預製連機弩。弩一發。四十九矢。賊皆應弦而倒。遂不敢追。捷走三

百里乃息。驗男女無一失者。蓋素日訓練之精也。國亡同。岑君隱居江東。後連舉三子。長曰嶽者。弱冠即能文。順治間。請赴科舉。太君不許。曰。前朝之失。皆由腐儒咬文嚼字。搢史侮筆。奸法所致。爾輩又何可復躡其轍耶。不如習弓矢。學力劍。為

國家建實。在功業。遂授諸子韜略。武藝數年。俱成將材。岑君卒。賈山雲開葬之。攝諸子家焉。卒年七十餘。

外史氏曰。岑太君可謂女中良將矣。何其訓士之精耶。有明垂三百年。專尚八股文字。武備不修。故賊一呼而堅城輒下。若得將帥如太君者。數輩精練甲兵。亦可滅賊。悲哉。竟無一人也。

侯贏論

陳玉璣

為人謀者。能使之建奇功。立赫赫之名。以震天下。不如使之相安於國家。而可以長保其功名。蓋君臣同心。無不可為者。一旦蹈嫌疑之跡。蒙不白之名。雖足以立大功。而不能一日安其身。吾獨悲侯贏智謀之士。能卻秦存趙。而無吾全信陵之策也。強秦者。天下所惡也。苟可以破之。雖計甚謫而不正。亦足以紓憤恨。而取快於天下。況毒加媾婁之國。而誼關不得已者乎。故為魏計。不可以不救趙。即魏王不許。為公子計。亦不可以不救趙。雖然。今有一人焉。其義勇智謀。足以破秦之堅銳。將一用之。而遂止乎。將不止於一用之。且賴以藩翰國家。而為強秦之所畏乎。如將不止於一用之。而使其藩翰國家。為強秦所畏。必使君不疑於其臣。臣不得罪於其君。而後可。如君已疑於其臣。臣已得罪於其君。是雖一旦破無敵之秦。成非常之功。將一舉而不可復振矣。夫是人也。義勇智謀。天下無與之比者。乃一舉之後。遂使君臣相疑。甚且廢而不用。坐視國家之日削。恐非為人謀而忠者也。侯贏是也。夫魏王之疑公子。非一日矣。方其與公子博。而北境舉烽。公子以為趙王獵耳。自後魏王不任公子。及乎秦圍趙。公子令賓客說王。萬端終不聽者。雖其意實畏強秦。而不信公子。亦顯然可見。侯生者。固深知公子者也。夫魏王之疑公子。既甚於前。為侯生者。宜因救趙之事。

曲以全之於王。古之辨士有一言相入。而時君為之改容反悟者。安釐王固易與耳。以侯生之智。或乘間說王。使明公子之忠信。極言趙亡之利害。未必不如秦之武信。齊之長安。復見信於王也。賓客萬端之時。獨無侯生在耳。假使魏王而悟。以兵予公子。重制閩外。長驅救趙。戰捷而歸。還兵於王。一旦諸侯有變。國家有難。公子為上將。諸侯附之。勢可無強秦矣。兵符盜於如姬。鐵椎加於晉鄙。而公子始不能歸魏。使無毛薛二公。則公子終竟為趙人。而魏之宗廟委地。一亡國大夫矣。侯生雖北嚮自剄。何以辭其罪哉。及夫河外之役。公子威震天下。而秦得借晉鄙客以行其間。稍奪之兵權。厥後日飲醇酒。多近婦人。鬱鬱不得志。淫樂以死。是於公子之身。一舉而不復振也。魏王之疑公子。至死而不已也。讀史者多咎魏王。為公子惜。不知甚魏王之疑者。侯生也。傷公子之忠者。侯生也。使以公子之才智。一用而遂止者。侯生也。使秦得行其間。而公子不得志以終者。侯生也。魏旋以亡。十八年而屠大梁者。侯生也。吾甚為侯生惜之也。

平勃論

陳平謂絳侯曰。於今面折廷爭。臣不如君。全社稷。定劉氏。後君亦不如臣。或曰。平勃實有長策。足以制變。呂后雖封爵橫加。原不能出其智計中也。或曰。平勃亦何有長

策。向令灌嬰不頓兵。平陽侯不聞賈壽之語。蘇商之劫不行。紀通之節不獲矯納。天下之為呂為劉。未可知也。要而論之。孝惠崩。呂后哭不悲。丞相如張辟疆計。呂后乃悅。則呂后之畏惡諸大臣。正猶高帝之殖醢韓彭。恐其亂我新造邦耳。其委諸呂權。意本欲安劉也。其分王諸呂。意亦本欲安劉也。甯若唐之武氏。期革李為周哉。羣臣習見呂后剛忍。少不承其意。必芟誅之。無易種。且呂后溺愛其所出。自不奪少帝位。而予諸呂。雖違白馬之盟。於國家大計。初亦無缺。况呂后年已七十。勢不獲久。若一旦釋位。復取漢家制度而釐定之。固可反掌致也。此平勃所為甘受阿意背約之誦。以全身耳。孰知天下變故。有非見之所能及。終不若王陵之慙。為得其正哉。前少帝雖非張后所生。然其言曰。后殺吾母而名我。我壯即為變。必猶為惠帝之美人子。而非他人子也。若後少帝及梁淮陽常山諸王。則竟非劉矣。若前少帝不死。所愛特諸呂耳。諸呂去。少帝即吾君也。至前少帝既死。而後少帝立。則大臣之燕居深念。應不徒在諸呂。而兼在少帝矣。令後少帝少有幹略。恐大臣疑己為非類也。與諸呂比。而誅大臣。大臣於其始立。既未以他人子爭之。至此安所逃其死。否則愧己為呂氏所立。恐大臣疑己為非類也。先誅諸呂。然後討大臣。頓首請幽前少帝之罪。大臣且悉負。隨不容誅矣。東牟侯安得除宮哉。蓋第患諸呂不妨明目張膽以治之。惟并患少帝。

始北軍左袒實出天幸。大臣有不得貪其功者。時劉揭說呂祿曰。帝使太尉守北軍。太尉謂朱虛侯曰。急入宮衛帝。是少帝之威令。原未始不行於下。下亦未始不奉為君也。其廢而殺之。大臣之陰謀。不過曰。今呂氏皆已誅滅。而置所立。卽長用事。吾獨無類矣。少帝若防患於早。而左右謁者。各不肯培兵而去。大臣將置代王於何地乎。非劉氏而王者。雖除之。非劉氏而帝者。卒偃然尸其位。安在其能安社稷。定劉氏後哉。大抵平勃之罪。不在王諸呂。在立少帝。平勃之功。不在誅諸呂。在去少帝。乃當日欲王諸呂。猶或尼之。至立少帝。悉將順之。惟恐後。謀誅諸呂。將相倉卒營圖。不遺餘力。去少帝則止為身家慮。而初非恐負高帝而鋤非類也。縱燕居深念。亦何以自白於天下。呂后之名。他人子為惠帝子。特婦人偏見。不忍以艱難創造之業。付之支庶耳。大臣祇知無呂后。卽不難制諸呂。抑慮及有不易制之少帝乎。其終得全社稷。定劉氏後者。幸少帝亦如祿產之庸劣耳。否則平勃雖有長策。恐無以謝王陵也。

雙斗崖記

林巒泉石之奇僻。居於人跡罕經之地。歷年久遠。無由一顯其名於人世。必鬱勃而不能自釋。苟遇探奇之士。披荆刺莽。以至其人。又工文詞。能一吐其千秋之奇。則林巒泉石。必交相鼓舞。奔走效順於其人。吾夫椒距城百二十餘里。屹立具區之間。有

驚濤駭浪之可慮。故遊觀者鮮至。山有僅塢名桃花者。為一山之盡。三面距湖。境遠
途狹。而桃花之盡。又有名熨斗厓。孤峯峭特。下與湖邊石齒銜斷。松檜蒼蒼。攢
蹙而輟。波濤激越之聲。漾然磔毛髮。土居之人。終歲亦未嘗一二至。可謂僻甚矣。
己酉春杪。予遠故鄉。與昆季捫籬扶杖。得涉其巔。俯仰之間。其奇華露。因歌詩以紀
游。而顧此失彼。脫左迷右。信乎奔走效順。詩不能窮其奇。然銜口而出。無意求工。悉
古今善狀景物者所未到。非詩輒能工。以境新而闕。未經人道。其言遠異於平時所
見聞也。馬退黃溪。鉅鏗諸勝。前此無聞。得柳州始著。予才不逮古人。文詞鄙野。不足
見稱。後日。獨以熨斗之奇。歷年既久。鬱勃而不能自釋。以時以數。或者千百年未顯
之跡。將在斯乎。將在斯乎。易固而亨。余於茲亦云。

惠山華孝子祠記

惠山蓋有華孝子祠。按齊史。孝子名寶。晉義熙末。生始八歲。父成長安。且行。謂曰。我
還為汝冠。後長安陷。父歿。遂終身不冠。亦不婚。或問之。不忍答。輒號慟。竟日。年七十
餘。以弟寬子為後。嗚呼。可謂孝矣。惠山無錫之名山也。自唐宋以來。凡四方游觀之
人。車轍馬跡。終日絡繹不絕。至惠山者。無不至。孝子祠瞻拜。歎息嗚呼。孝子之名。不
藉茲山顯。而茲山實藉孝子為榮也。孝子生於晉。長於宋。沒於齊。數十年之內。三姓

代更。當時所謂達官貴人。委蛇於教主之間者。何可勝計。孝子獨奉其父之一言。七十餘年。守之而不變。語曰。求忠臣於孝子之門。使孝子而仕於朝也。吾知必足以媿當日之為人臣者矣。獨念父所以詔孝子者。不過曰。還為汝冠耳。未嘗及婚也。乃因不冠而遂不婚。非孝而過者耶。舜不告而娶。君子以為大孝。孝子豈未之聞耶。然今觀華氏繁衍。甲於他族。貴顯者代必數人。人之稱者。必曰此孝子後也。宜昌則孝子固未嘗無後。又何論婚與不婚耶。戊申夏。余謁孝子祠。作而思曰。余與孝子不同為人子乎。不幸先君子見背。余且不與孝子同悲乎。先君子遺言之在耳者。不亦識之弗忘乎。欲為文以誦孝子。而涕泗交流。每不能自畢。其詞昔王偉元痛其父。每讀詩至哀哀父母。生我劬勞。號哭竟日。門人為之廢蓐。我之詩。彼讀古人詩者尚然。况觀其形容。而相感召者哉。嗚呼。余重有媿於孝子矣。

鹿忠節傳

鹿善繼字伯順。定興之江村人。又自號江村漁隱。幼端樸。斬新不為兒戲。洎舉博士弟子員。薄視章句。閉戶沈思。獨若有味。聖賢大旨。適大父直指吳中。郵書索王姚江全刻。自是專契其學。中明萬歷癸丑。進士。蕭然布袍草履。觀政某部。寄襍被。長安市中。日偕孫周兩君子。凜凜然。鳳節相砥礪。孫為徵君奇逢。周名景文。後忤逆璫慘死。

者也。假歸娛親之暇。輒以讀書學聖賢課弟子。每語人脫凡近。游高明而着力在義利關頭。尋授戶部山東司副郎。司職鹽法。時鹽法壞久。國家百萬經費。動出權宜。善繼曰。行新引。禁私鹽。使商人不苦上納百萬之利。可咄嗟辦矣。無何丁母憂。一號幾絕。服闋。補戶部河南司。署廣東司。職桂惠二王典禮。先是。中璫排闥。號司農之底。而珠商罕不應手。善繼推誠感璫。立給商價。典禮無缺。省經費萬計。廣東金花解道。至金花額為九邊設。後歸瓊林。是時邊餉將絕。善繼奮然曰。與其請內帑。曷若留金花。與其既入難請。曷若未進權留。且先發後聞。第歸到濟國事。同官歎曰。此舉差強人意。然非置一官度外不可。善繼曰。固然。果爾。未幾復原官。遷樞部。從高陽相出關。時邊疆多故。議者有畫關為守之計。高陽獨謂不計全局。關必不可守。善繼在幕府。經營慘淡。提百萬兵。指授二三大將。決密計。歷四年所。與高陽相倚如左右手。迨高陽以璫逐。善繼遂請告歸。會更朝政。珥璫起。善繼為重卿。旋晉太常。管光祿事。當是時。邊人不戒。天下兵帥脆弱。僅榆關可恃。袁督師勢已掉臂。朝議欲起高陽而吠聲者。猶藉茅馬相齟齬。蓋馬大帥也。茅君止生。名士談兵。隱隱有長城功。先是。辟毒高陽者。葉檇。二人虎口。善繼直前保護。得息其螫。而緩其獄。尋茅馬得出。而高陽遂起田間。後二人一以三十六騎。從高陽涉壘而東。一面拜金間之賜。手擊四城而還之。

於是高陽功在九廟而向微善繼曷至此。自是善繼病甚移疾歸。歿跡村居。日率嗣君奉親教諸孫。一以講學為事。問業者屢滿戶外。下至一方利弊。當路與革得失。無不深思遠料。未幾乃有丙子七月二十七日事。時兵從歡喜嶺入畿輔。糜沸甚。善繼居去邑南一舍。邑令迎請為城守計。遂遣子奉封公避難。而身獨入城。勉以忠義鼓舞。奈事權不在手。口感不感。口惠不惠。俄東隅不支。遂及於難。收遺骨。血漬未土。殷然當城破時。趨欲就義。文廟而門已闔。遂步至東隅小園遇害。內外諸臣錄實入告。贈大理寺卿。諡忠節。人或為封公慰者。公曰。我子名既著。除一死亦無別法。嗚呼。可謂是父是子矣。所著說約若干卷。尋樂大旨若干卷。認真草十五種。認真字為發金花時司吏尼語。蓋曰。公非此司官。偶值委署。何認真若此云云。高陽特以名編及死。哭以詩六十四章傳世。世哀之。

夫椒山人曰。嘗聞先生學以高明為宗。樂天知命為自得。實胎於索姚江一書。士先立志。信哉。至其棄銓司。馳塞上三年。卒恢復百里封疆。抑何偉也。一窮通齊得喪。不二於死生。唐之張許。殆其人耶。范陽撮土。與睢陽並傳焉可矣。

蘭副使傳

蘭剛中。字坦生。陵縣人也。申明崇禎辛未進士。授太常寺博士。擢南兵科給事中。十

六年。以山西按察司副使兼參議督糧。十月馳赴太原。當是時。賊李自成張甚。督師陳奇瑜以招撫養亂。自是督師屢更。而賊益熾。孫傳庭兵且潰。賊長驅入關。所過官吏迎降。往往奉敕印迎道旁。遂踞西安。以秦藩府為宮闈。置大小官職。圖東侵。天下震動。蔡懋德者。巡撫也。駐師蒲坂。以防西河。諸司道城守。分汛各門。剛中分守東城。諸司道督修守具。民登陴。擾擾不休。剛中獨處以寬靜。俾番休。時有陽和標兵三千。調防省會。驕蹇不戢。剛中慮為賊內應。遣之傳陳城外。自成方偽行仁義。為令四布。曰不徵糧。不殺人。不淫掠。民愚咸望其來。謠曰。將牛酒迎李王。李王來。不納糧。剛中力諭其詐。民乃無訛。十二月晦。蔡撫率軍入守省城。申嚴約束。與剛中等乘城堅守。是時將驕卒弱。不堪戰。惟中軍盛。應時以壯士百人遠探。十七年春正月。自成引兵寇河東。羣盜起為應。助其聲勢。所在望風款潰。獨汾州巡道范士髦擒斬偽官。墜壁待援。自成數以書抵蔡。剛中謂蔡曰。賊書不可發。徒亂愚民視聽也。三斬其使。賊益怒。會副總陳尚智倡逃平陽。降賊為前驅。二月六日。賊薄城力攻。明日。南關外城陷。果陽和叛兵內應也。裨將朱孔訓牛勇戰死。會暮。東南角樓火。賊乘機。城傳。蔡撫與剛中指授方略。發礮擊。盡力擊之。賊不得登。盡銳攻東城。城上烏機神鎗。弓弩木石交發。殺賊數千人。馬數千餘匹。賊設雲梯以登城。城上輒擊碎其梯。賊眾薄城欲上。城

上用鈎鉤賊殺之。賊以礮石仰擊城上人，發多不中。城上人益奮，又殺賊數百人。賊失利少卻。會夜陰雲四合，大風起，驚沙擊面如飛，礮集矢。城上人足立不牢，手不能持兵，賊益攻。督守益力，人無退志。遲明，守門將張雄降，賊內應，引賊登西南失守。城陷，賊盡入。剛中向闕再拜曰：「臣力竭矣，自縊未死，賊至執之。自成好語誘降，剛中厲聲叱，自成呼卒縛之，瞋目又叱曰：『死賊城陷，吾惟一死，豈有降賊求生。』」剛中厲印不與，與之食不食。二日氣益厲，遂遇害。元璽復躍起丈餘，衆驚愕。蔡懋德同時不佞死。威應時自殺其妻子，乃縊。布政趙建極副使毛某同死。及各官死者四十五人。先是賊將至，剛中有故人路之謙從之不去。剛中曰：「吾義當死，君無徒死焉。」之謙曰：「公死忠之謙敢不義，留為公圍身後，不徒死也。」及剛中死，賊執之謙，乃傷者再。既卒，蘭僕李自修求身首積骸中，越六日矣，猶凜凜如生。葉彝封識之，先是有郭姓子者，字視剛中尸之謙，乃得營葬。姓子剛中故吏，城陷其母妻妹八并死者五人。

夫椒山人曰：長安王棻夫與路品王游，得悉蘭副使殉難事，每每向人稱說。當城陷後，副使滕妾幾不免。品王護持匿民間，而山西士民感義，聚錢治行。品王遂挾東歸。副使無子。品王白諸大吏，請贈諡，得旨下部議，而國變矣。嗟乎！副使不負君，品王亦不負友哉。品王者之謙字也。語云：不知其人視其友，吾於蘭公益深信焉。

沈光祿傳

沈應奎字伯和號湛源常州武進人也少孤力學為人於氣節然諾不苟喜急人難
嘗同鄉里俠少年遊有絕人力置鐵簡自隨意有不平輒執簡起舞光上下閃閃颯
拉有聲舉萬歷乙酉孝廉教諭崑山公車四上不第遷知裕州應奎妻父邵芳丹陽
人亦以氣節自矜布衣徒步入長安名傾中貴人立起新鄭高相國拱於田間一時
長安嘖嘖稱邵樛休云樛休芳字也新鄭相既用而江陵張相國居正素不相能銜
樛休乃假他事殺之復計絕其後陰命族人圍其廬將以是日殺樛休兩孤應奎集
少年十餘人假丐者縋牆入奪兩孤以歸既守裕州三載旱民乏食嘯聚山礪間幾
十餘萬衆督撫分兵勦之不克應奎單騎布袍素冠入其壘衆駭然見身不介冑旁
無甲士稍延坐與語悅應奎且勸且誘衆曰征科日迫忍死須臾非得已也應奎曰
能從裕州守歸乎衆曰慮罪應奎曰爾以身委我我當善全爾相與痛飲數日夜衆
益感悟哭聲震陵谷悉縱火燒山解甲去大冢軍孫公丕揚過裕不道一使迎亦不
遽謁孫公怒突入應奎署應奎方焙餅炙韭將食遂邀孫公共食孫公奇之入朝言
應奎廉應擢部議例不可丕揚曰老臣特薦一人不用是不用老臣也詣闕叩首跨
馬出都上聞曰此老躁急猶昔命騎追之而擢應奎官刑部主事先是應奎公車經

費縣山中。與人并入古廟。少年數輩。扛巨木堵其門。應奎睨而笑曰。是須數輩乎。擅袖平舉之。一少年指神前石鼎曰。能舉是乎。應奎掣之行數十步。復置故處。少年舌吐不能合。應奎曰。吾所至嘗欲陰求天下士。爾等不足為也。拂衣去。河間郟舍有騾食人。觀者環列不敢救。應奎怒曰。奈何縱獸食人。持鐵簡奔入。三撲三避之。又撲簡入。目尺許。乃仆。其人已失半面。伏地狂號。望應奎猶作叩首狀。應奎少時。經鄉之陳渡里。土人家方產牛數月。力猛如虎。人稍近輒被啣。土人家釜甑器之屬。皆無完器。屋且折其兩角。厭苦無如何。應奎瞋目久之。躍身跨牛背。牛奔十里許。應奎攀道旁古樹。并力以兩足夾牛起。懸牛於空。有頃復檣之樹。從容而下。曳其牛。仍乘之歸其家。蓋其好奇於氣力類如此。盧孔禮者。交河義士也。路遇不平。毆其人。立斃。擊獄論死。父老聚語道旁。太息。應奎聞之。立詣縣語令曰。方今倭躡朝鮮。交河輪蹄四接。盜賊白晝劫行旅。公何不以誤殺贖之。俾部署少年守閭里。卒有事。可效死力於君。毋徒殺壯士。令因釋孔禮而語之曰。非我釋若也。吳中沈某實教之。時應奎已行。孔禮哀號。書應奎姓名。朝夕率妻子羅拜。及應奎下第。復經交河。孔禮同子弟輩伏道左。迎歸。妻女治養餅上食。兒子持土甌出沽酒。而里中羣少年聞沈公來。皆至其家。又手代孔禮稱謝。又三四少年持樽酒。爰雞黍。願與沈公共飲。應奎狂飲大醉。持簡

起舞談說古今壯勇義烈事。激昂流涕。羣少年皆仰天叩頭。誓為沈公死。孔禮再拜。把酒曰。孔禮與諸兄弟。既以身許公。如有事。當率五百人。裹糧服矢。以待命。惟公之所使之。應奎既官刑部主事。甫視事。司農以裕餉。兩年缺住俸。州民聞。如額匍匐解京。天子異之。御午門召應奎。與州民見。州民道應奎守裕狀。淚交頤。依依懇懇。應奎不忍捨。上大悅。賜應奎喜表裏萬歷庚戌。上不豫。召閣臣。至宮門。卻之。時福藩猶在邸。中外洶懼。福清相某公向高。謂應奎曰。事不可知。且奈何。應奎曰。竭股肱之力。以衛太子。萬一有變。公必死之。請以不肖軀徇公。福清相要應奎宿朝房。計令大司馬列兵圍諸王府第。大金吾領縱騎巡徼皇城。戎政分部京營兵屯九門。藩府人不得闌出。第中外寂然。應奎衷甲。與福清相同卧起。上豫乃出。當是時。代藩庶子鼎。涉不得立。議將立之。應奎疏劾大學士李廷機。不報。因語某宗伯曰。代藩之議。倘不悔禍。當持吾簡擊殺老魅於朝堂。旋自刑以明國法。何暇與喋喋爭筆牘間乎。由是忌之。而出知汀州。巡按御史某方至江。應奎每夕入院。指天象示之曰。客星犯前星。甚急。巡按目笑之。已而有挺擊事。應奎把御史袖曰。此大事。公安得不言。吾向語天象云何。顧左右趣紙筆。卽堂上起草。御史驚且慚。蠅嘯退。稅監高宗播虐。將由汀入粵。應奎大書榜示。直達城會。曰。稅監將入海。從倭抵汀境。太守當領吏民擊殺之。策

聞屏氣不敢經汀。尋以繼母病棄官歸。踰年復起。南光祿寺少卿。逆奄柄國。以東林削籍。年七十餘卒。

夫椒山人曰。神宗時。天下雖稱治平無事。而實多不測之憂。惜乎光祿負絕人之力。又得壯士五百人。悉以身許。卒不得用以死也。及光祿死。而天下且大亂。思得如光祿者而不可得。豈非天哉。豈非天哉。

卓屯田傳

卓爾康。字去病。杭州塘西里人。父光祿。署丞明卿。能詩。結客。諸老先生皆字之曰激甫。爾康。激甫長子也。為人孤峭介特。以世道為己任。雖生叔李穀。然以通經術講經濟為能事。天下士識不識。皆信之無異辭。中明萬歷壬子。舉人。當是時。俗重進士科。薄視乙榜。爾康憤其厚自灑濯。務使居官立身。度越進士科數等。授祥符教諭。署保封封邱。假守許州。所至頒立條教。繩罪。築圮橋。為百世利。入為國子監學錄。歷吏部都察院司務。尋升工部屯田司員外郎。當其在部院也。危言叢論。動引古誼。尚書掌憲。皆使文老吏。無不屈己從之。左遷常州府檢校。徙大同。推官。先是兒時。與胡休復同學。嚶嚶好古。嘗以許孟中高存之二君子為師友。休復選庶常。卒官。為木主祀中雷之左。并祀休復。父太公。及舉。主余御史之無後者。其為厚師友類如此。盧象昇督

府雲中。爾康以推官談兵事多當意。迨哈卜議起。爾康益發舒所欲言。卜順義王後也。西哈市馬。以卜為僧。足取一金。而陰哈哈金強半。謂之啞食。哈恨而謀侮之。乃好言謾我邊吏。昏盱衝鼓掌。謂侯封可契。度取爾康奏記督府。請邊吏不知大計。其故有三。卜四世保塞。今棄之以媚哈。謂我少恩。不足恃賴一也。哈易我而畏建。設言為我圖建。所謂空給王烏耳。二也。哈圍歸化城。十五日不解。卜銜我甚。必東走以孽我。三也。計莫若宣諭西哈。保全殘。卜我一言而解。卜圍。柱卜謾。銷建謀。此所謂知大計者也。象昇大悟。下邊吏施行。宣雲遂解嚴。當是時。象昇嚴重爾康。朝見屬吏罷輒入。延爾康為上客。磬折謝不敏。隅坐請事。議上時。漏下二鼓。象昇秉燭傳籤。質明而事定。聞者皆歎制府能知人。善任使也。先是萬盛間。河決山東。爾康年二十。與休復落第居金陵。一日。裏糧視高家堰口。諸生皆目笑之。舟船南北。迂道汴沿。訪問黃淮分合情勢。作河渠議十篇。旁及禮樂郊廟財賦漕運錢法官制六典會要。各有成書。而尤詳於武備。人皆易之。謂紙上兵法耳。至是皆歎爾康果知兵。而向之易爾康者。舌撓不能下。無何。量移兩淮分司運判。歲大祲。涕泣為淮人請賑。語切直多忌。用是罷歸。甲申國變。早夜呼憤死。人之惜爾康者。以為知兵如爾康。而卒不竟其用。他人已矣。象昇既能用之。而坐視其抑沒以終老。詎不可惜。使象昇疏留雲中。稍假兵柄。則

他日効於象昇者。未必不以死報。又未必不與象昇偕死。乃以分司未吏置之無用之地。不且為象昇惜哉。爾康有集三十卷。宗伯某為之序曰。百年而後。深思尚論。想見其為人。亦必有如余之廢書太息者。今不待百年。而士君子之好古者。皆已尊信之。夫椒山人曰。予嘗至塘西。過屯田者書處。徘徊留之竟日。令子人舉。盡出尊人遺稿示之。有易學五十卷。詩學四十卷。春秋辨義四十卷。書禮二經解數十卷。余稍繕閱。歎望洋而止。慨六經之學。不講久矣。專一經且不可得。乃貫穿之各有成書。根據蒐獵。悉得聖賢指要。嗚呼。豈可及哉。豈可及哉。

蔡氏傳

蔡氏閩漳浦之舊鎮女也。為里人張延祚妻。少翫。有大志。膂力過男子。而延祚亦以勇聞。稱義士云。王師既下。閩潰海數百里。猶多負固。方祐者。亦奇男子也。大舉兵。經延祚里。延祚與語不合。被殺。氏哀號日夜不絕。謀於夫之昆弟。欲盡散家財。購敢死士。為夫報讐。諸昆弟曰。是豈兒女子所能耶。出聲吾族亦矣。氏不敢復言。撫十數歲孤兒。晝則相抱哭泣。夜磨刀霍霍。仰天踊起。誓必殺祐。一日。聞祐兵宿某地。距其鄉甚近。日夕怕首跨鞞。衣短後衣。藏利刀。突至祐壘。未及數十步。反顧見其子踉蹌來。愕甚。執之耳語曰。若安得至此。曰。思母耳。氏頓足自念曰。兒幼不可舉事。且

吾以死決。兒脫有不測。張氏斬矣。遂挈之歸。一軍無知者。踰月。祐悔禍投誠。自束縛詣郡縣。郡縣官憐而釋之。俾復比編戶。已而娶於蔡。為氏王母女弟。氏因得常常見祐。每見益恚。髮鬢皆反裂。然不令祐覺也。祐且為甘語市之。氏亦曰。死者不可復生。方君舉兵時。肝腦塗地。甯獨夫也。君縱勿相慰。余忘之久矣。祐意大安。氏則益憤。齧指出血。每當更闌。漏下。人聲寂然。轉輾牀第。或起立開門。左右顧。旋入仰臥。泣聲啞啞。握利刃刺壁。壁既穿。刃刺猶不已。如是以為常。踰年為戊子春。氏偵祐往從父家大喜。陰挈其孤。止某地之松林。度祐必經此。氏推髻偏髻。挾刃以俟。日午。祐果至。雄服怒馬。顧盼自如。氏突出林中。大聲叱祐。祐驚遽。召其從者。從者駭走。氏急持刀。砍祐墜馬。祐負創狂奔。氏疾追之。行人麋至。環而譁。氏厲聲曰。吾夫為此賊所害。妾安可活。有助賊者。吾與俱死。爾警雪。妾當就死於官。且言且馳。祐攀松枝與鬪。中。氏額血被面。鬪益銳。淚血相近淋漓。往來衝突。驚若飛鳥。俄而祐被擒。氏以左手把其髮。右手奮刃。堪其胸。旋斷其首。擲道旁。觀者矚目。橋舌不能下。氏又揚言於眾曰。吾夫為賊所害。歲餘。目猶未瞑。必思飲其血。復提其頭。竟奔延祚墓。置頭墓石上。泣告。所以殺祐狀。把酒澆墓。凡三行拜。拜畢。攜幼子直赴巡按御史臺門。請死。御史霍達。關中人也。為人慷慨。任俠。聞其言。頗異之。欲縱之去。然疑有主者。氏慟哭曰。所以不卽

死者為三尺孤耳。今孤且勿顧。容受他人指使耶。幸勿以妾故亂國法。霍默然良久卒縱之。

夫椒山人曰。有江夏生者。與余善。為予具論其事。擅拳搯腕。目光瞬瞬。然射人。生亦以任俠殺人亡命江湖。其津津為人稱道。有以也。報怨恥雪名。垂後世。豈妄也哉。

募修龍王廟序

蒲松齡

淄東七里。有柳泉。邑乘載之。誌勝也。水清以冽。味甘以芳。釀增酒旨。湍增茗香。秦松翁割試之。驚自中冷外。得未曾有也。井丈許。水滿而溢。穿甃石。澗流出焉。故土人又名滿井。泉涓涓自流。自溢自波。折聽呼者。牛馬之。其出也。匯者淵之。流者溪之。夏潦秋霖。客水相續。則泱泱然河矣。蘭若外為泉。泉外為河。河外為山。山族而居。每坐泉上。小山簇簇。作兒孫羅列。圓如米聚。方如印覆。削壁開丹嶂。雜以垂楊。綠柳。縈青綠。白潭無斷際。河之陰。一道通南北。往來解賞者。輒坐流連。冬之日。甃石為煖。澤暑。行人望陰投止。望泉投止。脫汗笠。解衣。冒柳腰。則飲則浴。則憩坐。坐頃。風颯颯。泉泠泠。自謂子蓬萊不易也。泉不知何年。何主人創焉者。甃石不甚。斧鑿為游人所坐。衣麈拂而滑之。泉旁柳大百圍。為雨浸以濡。而空之矣。泉最久。故其神最靈。每場亢。遠近并柳。輦駐其下。呼神者三。谷淵淵有應聲。其聲徹。雨則立澍。天性上人。以是故。立意募祠之。俾祈禱有所憑依。其志良佳。然彼為一方。祝調順。余兼喜為邑中點景色也。故序之。

逸老園記

東阿。余別業也。村雖故小。山繞之。河又繞之。暑可漁。寒可樵。四時皆可臨眺。田平不

波頗宜稼。雖不阿阿矣。面冲山而村。村去山步武耳。山勝以石。石勝以穀。穀之勝以位置。以參差。逕之半尚以上。柔益進益上。則石氏族而居。分疆占據。少閒田。高狀。矗矗下狀。兀兀肥狀。悶悶瘦狀。稜稜虎若而伏。人若而立。羊若而羣。布置現示。費造物匠心。至不可品名。不可以馬策數。其最高有阿石。山之石之一也。尤奇石。凡三兩乘夾閒之。似混沌初。巨靈未擘時。曾為一物者。後裂之。架其裂紋也。壁良峭。或若磴而敬。而仄而劣。足容乎趾。狹行僅可上。其上則夷。容數十人分曹飲。然無敵者。醒可上。醉難下也。顧雨渠若躍。可過。亦無敢躍。平乃壯。險則怖也。坐其上。望村一簇。望河一綫。望羣山一抹。望田壠段復段。如疏畦。四望豁人懷。下石而東。可踴者一矢許。傾傾側側。石復枕石堆。疊岫間泉。灑灑出焉。亦阿名。水所逕成渠。渠迢迢至山根。不知幾許深。石纍纍漏之。大小皆為箇。滑潔不以繡媚。瀑激然與泉無涸時。冬則滄滄春則涓涓。夏而霖秋而潦。則崩崖挂練。激石播礫。不復文。山水皆鴻濛時舊物。曾無人賞焉者。山讓牛眠。水讓牛飲。村人不解登。登不亦解賞。天下事此類固多哉。余童時過輒游釣。夢魂猶戀之。修數椽屋。下菑。畏馬水宜沼也。而不沼。予沼之。沼之上宜柳也。而無柳。予柳之。與會一至。可以蔭。可以汲。即謂予家園亭。不禁樵牧也。可然。巖毛斑矣。又常抱維摩病。後苗獲壽。姑蠟之耳。齋扉晨啟。爽氣入懷。翠影到案。而石夾座上。

而樹蟻庭中。則卧游之時。多於兜輿也。予不文。不能傳水之神。石之色。山之面目。冀有能傳者傳之。人生山水色。山水生予色。為幸不既多乎。遂記之。

國朝文匯甲集目錄

卷二十二

戴名世字田有一字褐夫桐城人康熙己丑進士著有南山集子遺錄等書

宏光朝偽東宮僞后及黨禍紀畧

與余生書

答伍張兩生書

上大宗伯韓慕廬先生書

再上韓宗伯書

齊謳集自序

劉陂千庶常詩序

子遺錄自序

方百川稿序

闕里紀言序

方靈泉稿序

北行日紀序

一

八

九

九

十

十一

十二

十三

十三

十四

十四

十五

國朝文匯

卷二十三

目録

一

國學扶輪社印

醉鄉記

十七

睡鄉記

十七

陳士慶傳

十七

楊維嶽傳

十九

王養正傳

二十

劉孔暉傳

二十

一壺先生傳

二十一

實成傳

二十二

儀真四貞烈合傳

二十二

畫網巾先生傳

二十四

范增論

二十五

魏其論

二十七

讀揚雄傳

二十七

錢神問答

二十八

盲者說

二十八

薛大觀傳

二十九

曹先生傳

三十

楊劉二王合傳

三十

西河婦荏山女合傳

三十二

國朝文匯甲集卷二十二

宏光朝偽東宮偽后及黨禍紀略

戴名世

嗚呼自古南渡滅亡之迹未有如明之宏光者也地大於宋端親近於晉元統正於李昇而其亡也忽焉其時姦人或自稱太子或自稱元妣妖孽之禍史所載如此類亦間有而不遽亡者無黨禍以趣之亡也黨禍始於萬歷間浙人沈一貫為相擅權自恣多置私人於要路而一時賢者如顧憲成高攀龍孫丕揚鄒元標趙南星之屬氣節自許每與政府相持而高顧講學於東林名流咸樂附之此東林黨禍所自始也國本論起兩黨相攻擊如仇讐嗣是有妖書之役梃擊之役迄數年不定神宗晚節鄭貴妃寵愈甚其子曰福王上於諸子中獨憐愛之王皇后無子光宗於兄弟居長久未冊立而貴妃早貴顧天下有出鄭氏上者輒觖望即上亦兩難之一時名流以倫敘有定請早建太子語頗侵鄭氏上怒或黜或廷杖相繼不絕而言者彌衆皆以斥逐為名高政府如沈一貫與申時行王錫爵皆主調護而言者遂並攻之然上意亦素定卒冊光宗為太子而福王之國河南所以貴子甚厚諸子不得與比馬國本既定兩黨激而愈甚泰昌天啟紅丸之役移宮之役中朝相爭如烟燴沸莫與梃擊號為三案及魏忠賢為政浙黨盡歸魏氏作書言三案事訴斥東林號曰三朝要

典於是東林駢死半戶。餘斥逐殆盡。烈皇帝立定逆案。焚要典。而魏黨皆錮之。終身。崇禎十四年正月。流賊李自成陷河南府。福王遇害。世子走懷慶。事聞。上震悼。輟朝三日。泣謂羣臣曰。王皇祖愛子。遭家不造。遺於閔凶。其以特羊一告慰。定陵特羊一告於皇貴妃之園寢。河南有司改殯玉具中。祔世子在懷慶。授館餽養。備凶荒之禮。馬世子尋嗣封福王。王元妃黃氏早薨。繼妃李氏殉難死。王與潞王先後避賊。南奔崇禎十七年四月。烈皇帝山問。至南京。諸大臣議立君。意多屬潞王。而東林以三案舊事。有嫌於福邸。亦不利立福王。總督鳳陽馬士英遺書諸大臣。言福王神宗之孫。序當立。士英負縱橫才。初為太監王坤所搆。謫戍阮大鍼者。名在逆案中。時時欲出不得間。而與士英最善。崇禎中。大學士周延儒之再召也。大鍼歸於延儒。求薦已。延儒難之。遂以士英為託。曰。瑤草復起。是即大鍼復成也。瑤草士英字也。延儒入京見帝。言馬士英有邊才可用。遂起為鳳陽總督。至是大鍼與士英謀立福王。以福王與東林有鄰。福王立。東林必逐。如此而逆案可鑑。已可出也。兵部尚書史可法。詹事府正詹事姜自廣。兵部右侍郎呂大器。遺書士英。言福王有失德。非人君之度。不可立。是時士英兵權在握。與大將黃得功。高傑。劉澤清。劉良佐。深相結。諸將皆願立福王。如士英。旨吏科給事中李沾。復從中主其議。於是。以福王告廟。五月己丑。羣臣勸進。

王辭讓遂以福王監國。是日大清兵入北京。壬辰以史可法為東閣大學士兼兵部尚書。姜日廣為東閣大學士兼禮部尚書。俱入閣辦事。以馬士英為東閣大學士兼兵部尚書都察院右都御史。仍總督鳳陽。可法請分江北為四鎮。以得功傑澤清良佐分統之。所收中原州縣。即歸統轄。天下既定。爵為上公。世襲。復奏設督師於揚州。節制諸將。馬士英率麾下兵渡江。與羣臣合疏勸進。壬寅王即皇帝位。以明年為宏光元年。甲辰以卞城伯趙之龍總督京營。戎政密諭。參將王之綱迎母妃於河南郭家寨。李自成遣偽制將軍董學禮率兵南下。至宿遷。總督漕運路飛遣兵擊敗之。擒偽防禦使武愔。尊皇考福恭王曰貞純肅哲聖敬仁毅恭皇帝。妣氏曰孝誠端惠慈順貞穆皇太后。皇祖妣貴妃鄭氏曰孝甯溫穆莊惠慈懿憲天裕聖太皇太后。皇太后太皇太后皆生稱也。嘉靖中已釐正先朝之誤。而禮臣不考。猶仍其失。馬遂上母太妃鄒氏尊號曰恪貞仁壽皇太后。謚元妃黃氏曰孝哲懿莊溫貞仁靖皇后。繼妃李氏曰孝義端仁肅明貞潔皇后。帝既立。可法為首輔。亟召天下名流。以收人心。而士英挾擁立功。入政府。內通中官。外結四鎮。出可法於外。為督師。士英遂為首輔。四鎮惟黃得功忠勇奉朝命。而餘皆驕悍。不可法度。使得功進封靖南侯。左良玉甯南侯。封高傑為興平伯。劉澤清為東平伯。劉良佐為廣昌伯。可法至揚州。為高

傑所困可法開誠示傑傑感動願為可法死黃劉與傑交惡士英亦怒傑之為可法用也文武離心內外解體可法疲於奔命而國事日裂上優柔不斷而性寬厚政事一委任大臣不從中制坐是法紀皆廢而廷臣無不恣肆通賄賂中官之攬權婪賄尤甚自以從福邸來流離奔竄取金錢為衣食資上亦憐之而不之罪也及阮大鍼入而黨禍復烈譏謔宏多國家日以多故上在宮中每頓足謂士英誤我然大權已旁落無可如何而上多聲色之好自六月庚辰詔選淑女自是訪求之使出讖者早已料其不能終矣誠意伯劉孔昭奏都察院右都御史張慎言李沾已陞太常寺少卿奏呂大器定策懷二心兩人大鍼黨也上曰朕遭不造痛深君父何心大寶直以宗社攸關勉承重任效忠定策諸臣朕已鑒知餘不必深求已而慎言及日廣皆以爭大鍼之出相繼引去士英薦前光祿寺卿阮大鍼知兵予冠帶召見戶科給事中羅萬象御史王孫蕃陳良弼大理寺丞詹兆恆應天府丞郭維經懷永侯常延齡等交章言大鍼名在逆案不宜召上弗聽大鍼入對稱旨且伏地哭曰陛下只知君父之仇未報亦知祖母之仇未報乎祖母謂鄭貴妃也以三案挑激上怒自此始安遠侯柳祚昌復薦之以為兵部右侍郎旋進尚書左都御史劉宗周言於上請勿用弗聽七月己丑以左懋第為兵部右侍郎兼都察院右僉都御史奉使燕京傑澤清

舉故總兵陳洪範副之。至燕京，懋第不屈死。洪範陰輸款，且請南行為間。既至，密奏得功、良佐與敵通。二人上疏自辨。上曰：「此反間不足信。」洪範尋給假去。後洪範奉太后并執潞王以杭州降。自李自成敗走西安，山東諸州縣殺其偽官，復為明守。而南中無一官，無一兵出河北。自濟甯以西皆北降，惟濟甯設守。八月，大兵趨濟甯，下之。先是，劉宗周在籍，自稱草莽孤臣，請上親征。又言四鎮不宜封，姜曰廣擬優旨宣付史館。而宗周連疏言中外諸臣皆可誅，四鎮皆怒。傑澤清、良佐各疏劾宗周激變軍情，搖動乘輿。又與得功合疏言：「姜曰廣將危社稷，四鎮之橫日甚，而士英藉以遂其志。」劉用大鉞自是中朝之權。藩鎮皆得操之矣。初，大鉞以逆案廢錮，屏居金陵城南。溷於聲伎。當是時，東南名士繼東林而起，號曰復社，多聚於雨花、桃葉之間。臧否人物，議論騷起。而禮部儀制司主事周鏞實為盟主。其詆排大鉞不遺餘力。大鉞嘗以梨園子弟為間諜，每聞諸名士飲酒高會，則必用一二伶人闖入別部中，竊聽諸名士口語。顧諸名士酒酣，輒戟手詈大鉞為快。大鉞聞之，嚼齧搥牀，大恨。會流賊擾江北，烽火及於瓜步浦口。諸名士疑大鉞且為賊內應，則刊檄討之。署曰：「留都防亂無錫，顧杲為首，而黃池吳應箕、劉城、宣城沈壽民、唐允甲、宜興陳貞慧、松江徐孚遠、吳縣楊廷樞、錢棣、歸德侯方域數十百人附之。」大鉞內銜，且懼，獨身逃匿於牛首之祖堂。

使其腹心收買檄文。愈收而布愈廣。大鉞之客語大鉞曰：周鑣之名，以詒公而重諸名士黨人。又以詒公者，媚鑣。於是大鉞怨鑣。及諸名士刺骨，一旦得志，卽起大獄殺之。而未有以發也。及曠貴用事，與中官比暱，遂諫臣逆案諸人。如袁宏勳、楊維垣等，次第起用。先以蜚語逮鑣，及前山東按察使僉事雷演祚、繫刑部獄。從吏訊而捕囚諸名士校尉，紛出。踰跟奔竄，善類為之一空。定從逆六等條例，凡素有清望不悅己者，輒竄入其中。或有真失節者，反以賄免。羣臣日上疏相詆誅，上亦厭之。詔曰：朕遭九六之運，車書間阻，方資羣策，旋軫故都。乃文武之交爭，致異同之日甚。先皇帝神資獨斷，彙納衆流，天下事不堪再壞。且視朕為何如主。皇太后至自河南，道靈壁，侯火不化，戈矛轉興。天下事不堪再壞。且視朕為何如主。皇太后至自河南，道靈壁，侯湯國祚告於南郊。楊維垣追論三朝黨局。上曰：甯人躁競，不難矯誣。君父以遂其私，姑不追究。其三朝要典，禮部訪求入史館，以存列聖慈孝之實。又奏逆案多枉命吏，部分別起用。九江總督袁繼咸上疏言三朝要典為先朝所禁，不宜存而左良玉亦上疏論之。上曰：此朕家事，列聖父子兄弟數十年無間言。諸臣妄興誣構，今物故幾盡。與在廷諸臣功罪無關。朕已悉從寬宥，不必疑猜。袁宏勳奏繼咸庇護三案，繼咸上疏自辨。上曰：繼咸身任封疆，當一心辦賊，不得借端生釁。先是湖廣巡按御史黃

澍以論士英被收倚良玉不至。先後得罪者亦多。奔良玉軍。而呂大器先是劾士英以入朝為名。橫據政府。責官鬻爵。請上罷斥。上弗聽。尋致仕去。至是逮之。亦不至。失職之臣。駸駸扶藩鎮以抗朝廷矣。是時庶官非賄不入。政府與中官勦衛藩鎮。皆得操用舍之權。吏部尚書徐石麟不獲舉其職。去位。兵部之婪賄尤甚。奸人挾多金入都。即日可為大帥。前官方在任。而後官陞授者。累累皆是。及抵任。互爭。乃令新者候缺。而舊者欲固其位。乃輸賄新者。亦更加賄。以求舊者之速去。武弁橫行都邑。人莫之敢指。大賊黨亦盛。張孫振趙之龍馮可宗。皆為之爪牙。日以報怨殺人為事。其大旨務以離間骨肉。危動皇祖母。中諸名流。以非常之法。當擁立時。操異論者僅數人。而士英輩欲自張其功。凡有糾劾。必以此誣之。元年春正月。開封總兵許定國北降。誘殺興平伯高傑。二月。馮臚寺少卿高夢箕奏先帝太子在杭州。先是有妖僧大悲從北來。自稱為先帝。又稱為齊王。又稱為潞王。下鎮撫司訊。又稱為神宗子。因宮闈有隙。寄養民間。長而為僧。解連潞王與故相申時行。禮部尚書錢謙益。於是奏奸僧誣讒。而戶部侍郎申紹芳為祖訟寃。錢謙益自白。俱奉旨慰諭。而張孫振阮大鍼欲藉以起大獄。為匿名帖布於通衢。海內清流如徐石麟徐汧陳子龍祁彪佳夏允彝楊廷樞之屬。皆入其內。士英性本疎闊。不欲殺人。而大悲所言。一無所牽染。其獄遂

止。二月晦棄大悲於市。而明日國中傳言曰：太子至矣。上初聞夢箕奏其喜，遣中官踪跡至錢塘江上得之。三月朔至京，廷臣及士民擁觀，人人色喜。明日舉朝始知為高陽男子王之明也。之明髮垂肩，肌理白而舉止輕率，身傴僂而容有愁。初至居興善寺，已移至錦衣衛馮可宗邸舍。上御武英殿，命羣臣及左春坊左中允劉正宗、右春坊右中允李景廉、前詹事府少詹事方拱乾等審視。正宗等皆前東宮講官也。拱乾上指稱方先生及問正宗等皆不識。又問講書何地，講何書，習何字，皆不符。兵科給事中戴英進曰：先帝十六年冬，御中左門親鞠吳昌時，太子侍旁，憶之乎？不對。羣臣環詰之，乃言姓名為王之明，故駮馬都尉王昂之姪孫。曾侍衛東宮，家破南奔。遇夢箕家奴穆虎於逆旅，遂共卧起。穆虎教之詐稱太子，拱乾則於侍衛日識之也。奏上下之明中城兵馬司獄之明在獄中嬉戲自得，好飲酒，酒酣卽長歌，終夜不止。獄囚與之親者問女果太子耶？偽耶？皆不答。居數日，上遣中官張朝進同東宮伴讀邱志忠至錦衣衛，召之明再行審視。之明色甚怨，志忠審視良久，言曰：太子識我乎？之明不答。錦衣衛從容勸其無恐，之明對曰：休矣休矣。志忠仰而祝曰：以先帝之仁聖，遭禍亂至此，今無血胤，海內傷之。若果先帝子，願天誘其衷，遂辟踊大哭。之明卒不語。當是時，天子闇弱，馬阮濁亂朝政，人情憤激，皆謂太子為真。詎言繁典，一唱百和。

不可止也。大鉞輩又欲藉以起大獄，陷清流而夢其被酷刑，欲其有所連染。夢箕大言曰：「他人罪不能出我也。於是人情益懼，黃得功上疏言先帝之子及陛下之子，真偽未辨，乞多方保全以謝天下。若遽加害，天下必以為真東宮矣。」乃命養之獄中。俟布告天下，愚夫愚婦皆已明白。然後正法。袁繼咸及湖廣巡撫何騰蛟俱上疏乞保全。而劉良佐並言：「太子童氏之事，謂上為羣臣所欺，將使夫倫絕滅。童氏者河南人，自稱上元妃河南巡撫越其傑巡按陳潛夫信之，具儀從送至京，上大怒。下童氏錦衣衛獄。童氏色喜而甚口，東筆太監屈尚忠至獄中視之。童氏一見知其姓名，而所言王宮事皆不合，乃刑之。言在福王府為西宮。」又言為邵陵王宮人。且曰：「吾之與王別也。」嚙胸為記，分金為質。別後生一子，今四歲矣。在獄中時時號泣，日念其子不置。既被刑，稱病。上命醫調治，候鞠勿令致斃。於是醫者進視不報。一日忽不肯飲藥，求獄官為之祈禳。自言「已干支生三十二年矣。」獄官詭為之書符祈禳。童氏稱謝曰：「我不忘先生也。」居數日，產一男子，屬獄中婦人曰：「勿洩，洩則我必死。」累汝矣。投之廁中，復下刑部獄。五月壬辰帝奔京師，童氏出獄，不知所終。當大悲之既誅也。王之明與童氏先後至，而同時有妖人衣冠為道家裝，直入西長安門，門者止之，乃曰：「我天子也。」女不聞黃牛背，上綠頭鴨子，門者執之，乃為癩狀，奏聞杖而釋之。越一日又

一人衣青衣入西華門過武英殿幾入西甯宮乃太后所居也閩人叱之則云取御
林來吾今日御極擒送錦衣衛鞠之自言姓名為詹有邁南京人也平居奉佛佛擁
之入宮御極云云奏上命杖一百刑畢膚肉不傷亦無聲如其項則已死矣初上之
見良佐疏也曰朕元妃黃氏先帝時冊封不幸早世繼妃李氏又死於難朕即位之
初卽追封后號詔示海內卿為大臣豈不知之童氏冒詐朕妃朕初為郡王何東西
二宮之有且稱是邵陵王宮人尚未悉真偽王之明為王舅之姪孫避難南來冒稱
東宮正在嚴鞠果真實非偽朕於夫婦伯姪之間豈無天性况宮滕相從患難者頗
多朕於先帝無纖芥之嫌因宗社無主不得已從羣臣之請勉承重寄豈有利天下
之心加毒害於血胤朕夫婦之情又豈羣臣所能欺但太祖之天潢先帝之遺體不
可以異姓之頑童淆亂宗社宮闈風化攸關豈容妖婦闖入國有大綱法有常刑卿
不得妄聽妖訛猥生疑議因命法司先將二案審明情事昭示中外以釋羣疑然而
流言日甚而大兵已取盱泗過徐州駁駁乎及於儀揚矣左良玉在先帝時驕蹇縱
賊釀亡國之禍及上卽位數上書侵撓朝政聞有太子事上疏言大臣蔽主危害皇
儲時良玉且病其子中軍都督府右都督夢庚性凶狡遂舉兵反以奉太子密旨誅
奸臣馬士英為名陷九江良玉死復陷東流安慶京師戒嚴公侯伯分守城門傲靖

南廣昌東平兵入衛。命可法至江北調度。大鉞率兵巡防上江。大兵至無禦之者。及大兵已至儀揚門。而士英輩皆謂無虞。且欲藉北兵以破左。楊維垣等請追卹三案諸臣。劉廷元等二十一人。並復原官。仍各贈廕。有差。殺周鍾。雷演祚於獄。棄前兵科給事中光時亨於市。時亨有清望。以阻南遷下獄。至是與從賊周鍾武懷同殺。以辱之上。曰。朕為天子。豈記匹夫夙嫌。曾得罪皇祖妣皇考者。自今俱勿問。文武諸臣復舉任事。汗奏章者治罪。都督黃斌卿等與左兵戰於銅陵。敗之。得功大破。夢庚兵於板子磯。進封靖國公。世襲。加大鉞太子太保。諸將各陞。蔭有差。四月丁丑。大兵破揚州。史可法死之。五月丙戌。趙之龍密遣使賫降書。請大兵渡江。使者遭大風。舟幾覆。庚寅。京師晝晦。大兵抵南岸。壬辰。上如太平。幸得功營。阮大鉞隨之。馬士英奉太后如杭州。明日日中。奸民數百人。破中城兵馬司。獄出王之明。稱皇太子。奉之入宮。宮中金帛器玩。掠之幾空。有太學生徐鴻。手執表。號召軍民入宮。勸進無應之者。趙之龍執鴻殺之。乙未。保國公朱國弼入宮。執之。明出。幽於別室。大兵至獻之。不知所終。或曰。主兵者遣之去。之明不肯。遂留軍中。效僕隸之役。馬百姓又相聚殺士英。故所部黔兵及其姻黨。破人家。劫財物。之龍捕數十人殺之。城門晝閉。帝之出奔也。羣臣自盡者十餘人。而吏部尚書張捷。都察院左副都御史楊維垣。皆馬阮黨也。晚節自

全人皆異之。錢謙益本東林黨魁。文章氣節名天下。先帝時為邪黨擠之。幾死。及上
卽位。起禮部尚書。乃與諸邪黨合。大兵之至也。謙益降。且獻阮氏及妃嬪數人於豫
王為贖。阮氏者。諸生阮晉之女。謙益選為帝妃。與諸妃嬪皆未入宮。至是獻之。豫王
以阮氏賜孔有德。謙益授內院學士。未幾罷去。乙未。豫王營於郊壇。之龍率羣臣出
迎。己亥。豫王入南京。降將劉良佐引兵至蕪湖。劫駕如大兵營。黃得功死之。丙午。上
至南京。甲寅。北狩。順治丁亥五月初六日。上崩。馬士英之走杭州也。杭州人不納。遣
巡錢塘江上。而是時魯王監國於紹興。唐王卽皇帝位於福州。改元隆武。山陰王思
任以書抵士英曰。閣下文彩風流。素所嚮慕。當國破衆疑之際。擁立新君。閣下輒騷
氣滿腹。政本自由。兵權在握。乃不講戰守之事。而但以聲色逢君。門戶黨錮。以致人
心解體。士氣不揚。叛兵至則束手無策。強敵來則望風先遁。致令乘輿播越。社稷邱
墟。觀此茫茫。誰執其咎。余為閣下計。莫如明水一盃。自刎以謝天下。則忠憤之士尚
可相原。若但求全首領。亦當立解兵權。授之守正大臣。呼天搶地。以招豪傑。今乃遁
遂江上。效賈似道之故轍。人笑褚淵。齒已冷矣。且欲求奔吳越。夫吳越乃報仇雪恥
之國。非藏垢納汙之地也。吾當先赴胥濤。乞素車白馬。以拒閣下。士英尋入浙東。持
兩端觀望。既蹙戰敗。則與總兵方國安。大學士方逢年。北降。燕猶與隆武通。為大兵

所覺駢斬於黯淡灘。大鉞自蕪湖走浙江。先是大鉞已先士英降矣。金華人朱大典以東閣大學士兼兵部尚書城守。而大典故督師南中。與大鉞同事。至是大鉞抵金華。自言窮迫來歸。大典憐而納之。大鉞為內應。金華破屠之。大典自殺。闔家五百人皆自焚死。大兵遂連收金衢諸郡縣。將踰仙霞嶺。抵青湖下壁。會大鉞有微疾。軍中相與親愛者謂之曰。公老矣。得無苦跋涉。吾等先踰嶺而公姑留。此調攝。徐徐至福州可乎。大鉞慨然變色曰。吾雖老。尚能射強弓。騎壯馬。且今欲取七閩。非吾不可。奈何而言若是。復慨然歎曰。此必東林復社來間我也。軍中不解東林復社為何語。曰。公行矣。非敢相阻也。明日。全軍踰嶺。大鉞下馬步行。越捷如飛。持鞭指乘馬者而詬之曰。若等少壯男子。顧不及老秃翁。顧盼矍鑠。軍中頗壯之。行至五通嶺。則喘急氣息不相屬。坐於石上。遂死。其家人最後至。見之。乃下嶺買棺。而是時沿途居民皆奔竄。過覓無棺。閱一二日。乃昇大扉至嶺上。會天暑。屍蟲盈於路。僅存腐骨而已。嗚呼。南渡立國一年。僅終黨禍之局。東林復社。多以風節自持。然議論高而事功疏。好名沽直。激成大禍。卒致宗社淪覆。中原瓦解。彼鄙夫小人。又何足誅哉。自當時至今。歸怨於僞主之昏庸。醜語誣詆。如野史之所記。或過其實。而餘姚黃宗羲。桐城錢東澂。至謂帝非朱氏子。此兩人皆身罹黨禍者也。大略謂童氏為真后。而帝他姓子。詐稱

福王恐事露故不與相見。此則怨懟而失於實矣。觀帝言宮媵相從患難者頗多。流離顛沛之餘不能絕衾稠之愛。一則幸舊好之猶存。一則憤偽託之妖妄。皆未可知也。而王之明一事。至今猶流傳以為真。余得備著其說以告世焉。太子性仁弱。生十年行冠禮。執圭見羣臣。進止不失尺寸。既講學。出居端敬殿。諸臣進講章。上親為刪正。太子於經籍多宮中所講習。書法尤工。既長。元旦早朝。未嘗不在側。上有所誅賞引之共視。且曰羣臣所上書。其意多為人營私解糶。而故用浮詞。嘗我勿為所欺也。太子母弟二次為懷隱王。次定王。故宮中呼定王為三皇子。永王年與釣。田貴妃出也。當賊之陷京師也。上御便殿坐。命宮人曰。傳王兒來。主兒謂太子二王也。太子二王猶常服入。上曰。此何時。可弗改裝乎。亟命持蔽衣至上。為之解其衣換之。且手繫其帶而告曰。女今日為太子。明日為常人。亂離之後。匿形迹。藏姓名。遇老者翁之少者伯叔之。萬一得全。來報父母仇。無忘我今日言也。太子二王及左右皆哭失聲。班亂上起入后宮。后已崩。上尋傳殊諭至文淵閣。命成國公朱純臣輔翼東宮。會閣臣皆出。中官置殊諭案上而去。純臣與太子皆不之知也。賊入得殊諭於閣內。即收純臣殺之。純臣無他技能。上徒以其元勳班首。故託以太子。而太子為賊所得。竊於賊將劉宗敏所。李自成之西竄也。人見太子衣緋乘馬。隨自成後。初左懋第之北使也。

密書與史可法言太子在燕京而可法先是亦誤以王之明為真太子嘗上疏爭之及得懋第書自悔為書與馬士英具述懋第語且言一時有偽皇后偽東宮二事深可怪歎士英因將可法書刊而布之初賊之以太子出也不知何以得脫於賊徒步至前嘉定伯周奎家奎烈后父太子外祖也是時太子姊長公主養於奎家相見掩面哭奎舉家拜伏稱臣已而奎懼禍言於官曰太子不知真偽今在奎家奎不敢匿也因徧召舊臣識之或謂為真或言為偽謂為真者皆死太子絞殺於獄中朝中皆言其謀出大學士謝陞陞崇禎中位至宰相子告家居宏光時加陞上柱國少師兼太子太師禮部尚書而陞已北行矣至是都人圍其第宅而害之陞不安請告去尋死自言見錢鳳覽為厲而殺之錢鳳覽者亦言太子為真被殺者也先是宏光元年二月傳言太子及二王皆遇害及謚太子曰獻愍定王曰哀永王曰悼而二王不知所終謹按崇禎十一年四月己酉夜熒惑逆行尾八度為月所掩五月丁卯退至尾初度漸至心心太子之象郝翰曰犯太子太子憂犯庶子庶子憂至十七年十月前星下移四五度太子撫軍監國不離其位下離者為主器已亡之象嗚呼明之亡也雖曰人事豈非天命哉

與余生書

余生足下。前日浮屠犁支。自言永歷中宦者。為足下道滇黔間事。余聞之。載筆任問。焉。余至而犁支已去。因教足下為我書其語來。去年冬。乃得讀之。稍稍識其大略。而吾鄉方學士。有滇黔紀聞一篇。余六七年前嘗一見之。及是而余購此書。取犁支所言考之。以證其同異。蓋兩人之言。各有詳有略。而亦不無大相懸殊者。傳聞之間。必有訛焉。然而學士考據頗為確核。而犁支又得於耳目之所親記。二者將何所取信哉。昔者宋之亡也。區區海島一隅。僅如彈丸黑子。不踰時而文已滅亡。而史猶得以備書其事。今以宏光之帝。南京隆武之帝。閩越。永歷之帝。兩粵。帝滇黔。地方數千里。首尾十七八年。揆以春秋之義。豈遽不如昭烈之在蜀。帝島之在崖州。而其事漸以滅沒。近日方寬文字之禁。而天下所以避忌諱者。萬端其或菰蘆山澤之間。有屢屢誌其梗概。所謂存十一於千百。而其書未出。又無好事者為之收拾流傳。不久而已蕩為清風。化為冷灰。至於老將退卒。故家舊臣。遺民父老。相繼漸盡。而文獻無徵。凋殘零落。使一時成敗得失。與夫孤忠效死。亂賊誤國。流離播遷之情狀。無以示於後世。豈不可歎也哉。終明之世。三百年無史。金匱石室之藏。恐終淪散。放失。而世所流布諸書。缺略不詳。毀譽失實。嗚呼。世無子長孟堅。不可聊且命筆。鄙人無狀。竊有志焉。一而書籍無從廣購。又困於飢寒衣食。日不暇給。懼此事終已磨滅。時則有明全

城之畫且不得見而又何況於夜郎筇笻昆明洱海奔竄流亡區區之軼事乎前日翰林院購遺書於各州郡書稍稍集但自神宗晚節事涉邊疆者民間汰去不以上而史官所指明以購者其外頗更有潛德幽光裨官碑誌記載出於史館之所不及知者皆不得以上則亦無以成一代之全史甚矣其難也余夙昔之志於明史有深痛焉輒好問當世事而身所與士大夫接甚少士大夫亦無有以此為念者又足跡未嘗至四方以故見聞頗寡然而此念未嘗不時有也足下知犁支所在祈召之來與余面語其事則不勝幸甚

答伍張兩生書

人來承示近日所為文數首並以為文之道殷殷下問余學殖荒落安有以發足下者耶顧其平日頗有志不肯為世間言語既辱二生之問其昌敢以區蓋余昔嘗讀道家之書矣凡養生之徒從事神仙之術滅慮絕欲吐納以為生咀嚼以為養蓋其說有三曰精曰氣曰神此三者鍊之凝之而渾於一於是外形骸凌雲氣入水不濡入火不熱飄飄乎御風而行遺世而遠舉其言云爾余嘗欲學其術而不知所從乃竊以其術而用之於文章嗚呼其無以加於此矣古之作者未有不得是術者也太史公纂五帝本紀擇其言尤雅者此精之說也蔡邕曰鍊余心兮浸太清夫惟雅且

清則精精則稽粕煨燼塵垢渣滓舉凡邪偽剽賊皆刊削而靡存夫如是之謂精也而有物焉陰驅而潛率之出入于浩渺之區跌宕於香藹之際動如風雨靜如山岳無窮如天地不竭如江河是物也傑然有以充塞乎兩間而蓋冒乎萬有嗚呼此為氣之大過人者豈非然哉今夫語言文字文也而非所以文也行墨蹊徑文也而非所以文也文之為文必有出乎語言文字之外而居乎行墨蹊徑之先蓋昔有千里馬此而黃伯樂使九方皋視之九方皋曰牡而驥伯樂曰此真知馬者矣夫非有聲色臭味足以娛人之耳目口鼻而其致悠然以深油然以感尋之無端而出之無跡者吾不得而言之也夫唯不可得而言此無所以為神也今夫神仙之事荒忽誕謾不可信得其術而用之於文章亦足以脫塵埃而游於物外矣二生好學甚篤其所為文章意態蕭然既間且遠蓋有傳於吾之云云者而世俗之人不識也吾故書以告焉吾聞為乎仙道形解銷化其術秘不傳即傳其術不能通嗚呼遇之而得傳傳之而通者非二生吾誰望之

上大宗伯韓慕廬先生書

布衣窮居之士欲自刊刻其文念無以取重於世乃求序于王公大人王公大人賜之序則欣欣然以之自多不自多其文而多王公大人之序以為榮耀夫文者必待

王公大人而重。則是孟子七篇成。而必請序於齊宣梁惠司馬遷史記成。而必請序於丞相公孫弘大將軍衛青也。且夫意氣不足以孤行。而後有所附憑。言語不足以行遠。而後思所以炫其聲名。彼乞序於王公大人。而欣欣然遂以之自多。不待觀其文而已。其知不足重矣。彼王公大人不能却其請之堅也。亦不知其文之工拙。果何如。率爾命筆。不無過情之言。人之見之者。讀未終篇。輒已掩卷而去。而況於其所序之文乎。是則王公大人之序。且不能自重。而又安能重士之文。此所以有志之士不求序於王公大人。凡以自重其文。而王公大人之賢者。亦不輕與人以序。亦所以自重其序也。今之大人先生。以文章名天下者。獨閣下一人。往在京師。閣下嘗為不肖言。士之以求序來者。比肩接踵。然大抵多所謝絕。於是不能得閣下之序而去者。不啻十之九矣。嗟乎。唯閣下不輕與人以序。而乃可以序不肖之文。唯不肖不求序於王公大人。而乃可以求序於閣下也。不肖至京師。前後凡五六年。未嘗上書宰相。獻文當途。賢公卿弘獎士類。其所為大書深刻。標榜窮士之言。充棟盈几。而不肖不與焉。獨閣下見其所為文。而以為可與於斯文也者。一日偶序不肖舉業文若干篇。不肖歸而刻之於金陵。而天下讀閣下之序者。往復誦誦。詠嘆咨嗟。初非以閣下名位之故而讀不肖之文者。謬相引重。亦非以閣下之序故也。唯如是而閣下乃可以序

不肖之文而不肖乃可以求序於閣下矣嗚呼文章之事雖非有用於世而未可以爵位勢分緣飾於其間亦視乎求序者之人與文何如與序之者之人與文何如而已頃者金陵一二人士取不肖所為古文刊刻其十之二三用是潔誠齋慮北面叩首而求閣下以序之夫舉業之文非閣下之所好而亦非不肖之所好也閣下猶肯執筆為之序而況不肖之古文固閣下所素吝窺以為可與於斯文者乎知閣下之不與他人而一槩謝絕之者蓋他人之所求者乃當世學士之序而不肖之所求者乃慕虛先生之序也俯伏俟命不勝至願謹再拜

再上韓宗伯書

名世再拜名世平居讀書考文章升降之際竊見夫文章之事未有不上與下合而能至於極盛者也上與下合而風氣之權操之自上上之人懸其令以倡率之而下之人莫不奔走恐後而不敢有異議於其間若夫上之人所操者不足以壓服乎下之心而下之人紛然囂然各持其說各挾其技而有菲薄乎上之心考校之文一出而心非卷議噴然流傳共指以為笑於是上之與下兩相管轄齟齬扞格截然而分為二而文體遂不可振翼者文章之風氣嘗亦委靡卑弱而不振矣先儒之精義不明古文之規矩盡裂上之人所以取于下下之人所以獻于上者皆雷同相從而已

雖其風氣之不振而上之與下警警之聲不出於口。齟齬扞格之狀不形於色。而風氣欲變之機固已伏於此矣。當此之時。閣下遂獨以雄奇渾古之文出而大魁天下。天下之人。請閣下之文。恍然如寐之方覺。如醒之方醒。皆翻然忽改其所為。三十年來。窮巷枯槁之士。被服先民。抱殘守缺。以不棄於斯文。閣下之力也。閣下既以古文取高第。為大官。而天下之人。又翕然嚮風。愈久而不衰。則宜上與下合為一矣。乃警警而不入。齟齬扞格而不相通。未有甚於今日者。何也。則毋乃下之信且從於閣下者。適以望於上之人。而不克副其望。歟。遂直為此紛然。驚然也。今甲三年而一試士。棘未撒。士或私相許曰。某某者必得售也。又或私相誚曰。某某者必斥勿錄也。已而斥之者。則其許之者也。錄之者。則其誚之者也。不能不相顧以駭。而羣不逞。遂借以行其私。至於詆訐叫號而不可止。上之人患之。而未能有以弭之也。竊以為弭之之道。在上之人。勿故與下之人相反而已矣。下之人曰是也。而上之人必曰非也。下之人曰非也。而上之人必曰是也。參差之見。先橫據於胸中。其說究無以勝乎下之人。則安能厭服乎其心。而使之不敢有異議於其間也哉。且夫天下之人。其所操未必盡是也。紛然器然而出於詆訐叫號。即下之人有志者。亦未嘗不非之也。然而公論多出於其間。公論者。上與下共之者也。下之人方以公論自張。而上之人故欲反之。

非其心也。則毋乃拘囿者之風氣而不能以閣下之道為進退天下士之具歟。下之人以其信且從於閣下者。通望於上之人。其所以待上之人者甚厚。而上之人不能以閣下之道為進退天下士之具。於是乎上之與下。兩相訾謗。齟齬扞格。截然分為二。而閣下以一身居上下之間。則驅之使合。其權仍在閣下而已矣。閣下文無論知與不知。莫不肅然起而斂衽退避。以為不可及。而閣下之名德清望。又為海內之所嚮仰。謂閣下之道。下之人信且從之。而上之人獨不肯信相從者。必無之事也。轉移之權。則唯在閣下一為昌言正告之而已矣。名世住在京師。與閣下遊。凡一二年。相與縱論當世。獨未嘗言及文章之事。名世身在卑賤。有言不信。故不得不藉藉以居。默默以處。而閣下方在日月之際。經綸密勿。更有重且大者。文章一事。遂有所不暇及耳。然而當今文章之責。實在閣下。不宜使窮巷枯槁之士。缺然失望。生視上之與下。訾謗而不入。齟齬扞格而不相通也。名世南歸。數載不復。有志當世。行吟江上。將欲灌園以終老。習見夫下之人所以仰望閣下者。如此其至。而轉移之權。使上之與下相合而無二。非閣下不能。故輒為達其區區之情。馬。冒瀆尊嚴。無任惶恤。不宣。

齊謳集自序

余少好誦古人之詩。時時誦之。然輒不復記憶。間為詩。其於古文之旨不肖也。因遂

棄去。自是往再浸尋。身在貧困。而曾無以發憤懣之什。嘗自惜且恨之。數年以來。客遊四方。篋中無他書本。可以度日。而有感觸。輒亦偶為詩一兩篇。既成。猶軋不錄。蓋余之志。欲入山窮居。專精思慮。以務比肩於古人。非是弗為。為之亦弗存也。戊辰己巳之間。自燕踰濟。遊于渤海之濱。偏歷齊魯之壤。同遊者數人。與余皆困不得志。於是多賦詩以自遣。而余故不工詩。勉而為之。得一百餘篇。方擬棄去。而同遊者顧謀加賞。戮力勸余存其稿。余俯仰從之。然非余之志也。嗚呼。詩之衰久矣。世之人粗能識字。卽高自夸詡。欲登壇坫。以爭名聲。其于古人之詩。多能議論短長。分別門戶。譬之盲僮跛豎。各以其意喜怒主人。而擅抗攘臂于藩籬之外。而主人曾莫之知也。不亦大可悲乎。余行且歸隱故山。終身弗出。縱觀古人之詩。而因以有吐發憤懣之什。或有當乎。而茲集之存者。同遊數人者之志。非余之志也。數人者。為無錫劉齋。武進白寶。宿江朱書。溧陽史騏生。常熟翁振翼。華亭畢大生。山陰胡廣昌云。

劉波千庶常詩序

詩之亡於人間久矣。其故果安在耶。古之人未嘗欲名其詩也。而固已有詩。今之人徒欲名其詩而已。徒欲名其詩。而固已無詩矣。古之人雖田夫野人。女子皆能自言其情。情之至而詩自工。今之人以詩為取名聲爭壇坫之具。自汨其情。而亡其己之

詩以務摹擬夫古人之詩此詩之所以衰也數千年來詩數變而其變愈下彼此訾
謗互起迭扑凌遲至於今而世之說詩者其術更黠而其說更譎詐而不可窮語彼
蓋知古人之不可非也於是據其說而指之曰古人在是也為之峻其牆垣固其藩
籬彷彿其形貌之萬一以為己之所獨有而他人之所不能至又懼天下之不吾信
也於是恫疑虛喝而傲睨顧盼以濟其術之窮庶幾天下之可欺不深察吾之所以
而震而驚之而吾之詩可以名嗚呼世之說詩者此其術也而豈復有詩哉余不能
詩也而於詩之旨猶稍稍能識之自游學四方見世之所名之詩不復有詩也而頗
意世所不名之詩其中必有詩焉而果得庶常劉君陂千之詩陂千退讓君子也其
容貌粥粥然其與人交溫溫然其言語辭氣恂恂然嗚呼此陂千之詩也陂千之言
曰吾惡夫世之名其詩者吾之詩吾自抒其情而已不以名也蓋陂千之詩皆深自
藏匿不以示世余索而讀之見其情皆陂千之情而詩皆陂千之詩按之古人之旨
自不相遠也使世之說詩者見之必求其瑕疵而議之曰某句不似某家即不然或
謬為稱之曰某句似某家某句又似某家必欲盡汨陂千之情使之輾轉愴怳而無
所適從嗚呼其亦不仁甚矣宜陂千之匿不以示世也陂千之尊府先生詩最多亦
最工先生生平不以詩示世人亦未有以詩名先生者而吾又嘗見陂千仲弟檢討

君詩數首。其旨亦如是嗚呼。詩亡于人間久矣。而猶存乎劉氏之一門。凡其所以存者。皆不汲汲于名者也。彼世之說詩者。其名何有也。

子遺錄自序

余所著子遺錄。既成。北平王源為之序。而余復自為之說。曰。甚哉。明之亡也。非其罪。豈不可哀也哉。自秦漢以來。天下承平之久。未有如明。而其敗亡之禍。亦未有如明之烈者也。明之取天下於盜賊。而其失天下也。亦於盜賊。彼秦寇者。皆國家之赤子。受休養之恩。垂三百年。非若敵國外患。而一旦稱兵起事。橫行天下。斬艾吾民。藩王滅。天子死。而國祚隨之。此自古以來之所未有也。當是時。天下承平久矣。人不知兵。士大夫漫不以賊為意。而行間大吏。相繼縱賊。以成賊之強。中朝以門戶相爭。而操持閭外之事。使任事者。轉輾傍徨。而無所用其力。直至於國亡君死。而後已焉。此其罪甚於盜賊萬萬。嗚呼。豈非天子。賊起秦入晉。蔓延於畿南河北。復渡河蹂躪江淮。河洛湖湘巴蜀之間。名都大邑。所向皆破。而吾桐獨完。桐小縣。僅彈丸黑子。本數千。瘡殘之民。疲敝之卒。而抗百萬方張之師。前後凡十餘年。濱於陷者數矣。而卒獲完。豈非以賢有司之拊循。士大夫之設守。而兵民之戮力與。余從諸父老。問吾桐前後攻守之事。稍稍得其梗概。因著為一書。而當時文武用兵之畧。亦以附見。使作史者。

有所採擇焉

方百川稿序

金陵之城北有二方子。曰百川曰靈臯。兄弟皆有道而能文章者。靈臯之文雄渾奇傑。使才人皆廢而百川之文含毫渺然。其旨雋永深秀。兩人皆原本於左史歐曾。而其所造之境詣則各不相同也。靈臯客遊四方。其文多流傳人間。百川閉戶窮居深自晦匿。世鮮有見其文者。要其文淡簡亦非凡近之所能識。以故百川聲稱寂寞。甚於靈臯。頃余家青溪之滌距二方子四五里而近。時時相遇。從得盡讀兩人之文。往往循環雖誦不忍釋去。已又悲世有嘉文。使之沉淪里巷之中。略不知惜。而紫色蠅聲。世相與尊崇推奉。使之志滿氣得。以為當然。良可嘆也。今年靈臯北遊。餽其口於涿鹿。而余亦賣文燕市。未有過而問其直者。將遂歸老江上。灌園自給。與百川兄弟寂寞著書。以俟之於後世。而靈臯自涿鹿貽書于余。曰。知吾兄之深者。莫如戴子。是宜為文以序之。嗚呼。余自從事於文章。舉世不以為工。獨二方子環堵一室。相與咨嗟吟誦。人皆笑之。今又以序方子之文也。適增其笑而已矣。他日歸。當盡取百川之文。次第排綴。為闡發其波瀾意度之所在。所以然者。且刊以出之于世。而余為聊且書其梗概如此。

闕里紀言序

闕里紀言者。湖州宋像菴先生之所作也。先生自少沈浸。反覆於宋五子之書。慨然以斯道為己任。而傷邪說之橫行也。人心之陷溺也。聖人之道之不明也。作闕里條議如千篇。遂乃渡江涉淮。踰濟至如臯。謁闕里志其所見聞。又如千篇。其名之曰闕里紀言。而刊布之於京師。冀世有讀其書而行其說者。余考其旨。大抵言邪正之辨。補曲禮之缺。正世俗之訛。而於佛氏尤痛疾之不少。假刊且成。屬余序之。余少而失學。長而羈滯流落。於聖人之道。茫不見其津涯。其何能為役。然竊以謂先生之說。雖未果。即能行。而留以俟後之君子。有所折衷考訂。則是書之刊。亦不可以已也。今夫佛氏之為患也。莫大於竊吾性命精微之旨。以為明心見性。而最淺陋惑人之甚者。莫過於福田利益輪迴生死之說。佛亦自知其妄也。曰吾特寓言。以驅天下之人。入於善也。己則誕妄。而欲人之從己。佛至是亦悔其窮矣。而世俗靡然從之。相與叛聖以媚佛者。在吾儒之徒為甚。先生以垂老之年。山澤之臞。不憚辭而闕之。呼號痛切。擗臂扼腕。而與之爭。彼佛氏之徒聞之。以整以暇。不動聲色。而吾儒之徒。皆為之困。其壁壘樹之旗幟。相與裂背。皆大呼按劍操刃于先生。以快彼之心。而後已。則為吾道患者。不在於佛氏明矣。故佛之佛易去也。儒之佛不易去也。明心見性之佛易

去也。福田利益輪迴生死之佛不易去也。士苟有志者。共伸討賊之義。而此操同室之戈。使儒之佛還而為儒。則佛之佛不攻而自破。使福田利益輪迴生死之佛。不得進其說。則明心見性之佛。亦沮喪而不振。安知不由先生是書而為之嚆矢也哉。

方靈臯稿序

始余居鄉年少。冥心獨住。好為妙遠不測之文。一時無知者。而鄉人頗用是。謝天居久之。方君靈臯與其兄百川起金陵。與余還相應。和蓋靈臯兄弟亦余鄉人。而家於金陵者也。始靈臯少時。才思橫逸。其奇傑卓犖之氣。發揚蹈厲。縱橫馳騁。莫可涯涘。已而自謂弗善也。於是收斂其才氣。潛發其心思。一以闡發義理為主。而旁及於人情物態。雕刻鑿錘。窮極幽渺。一時作者。未之或及也。蓋靈臯自與余往復討論。而相質正者。且十年。每一篇成。輒舉以示余。余為之點定評論。其稍有不愜於余心。靈臯即自毀其稿。而靈臯尤愛慕余文。時時循環誦誦。嘗舉余之所謂妙遠不測者。彷彿想像其意境。而靈臯之孤行側出者。固自成其為靈臯一家之文也。靈臯於易春秋。訓詁不依傍前人。輒時有獨得。而余平居好言史法。以故余移居金陵。與靈臯互相師資。荒江墟市。寂寞相善。而余多幽憂之疾。頽然自放。論古人成敗得失。往往悲涕不能自己。蓋用是無意於科舉。而唾棄制義尤甚。乃靈臯嘆時俗之波靡。傷文章之

萎蕤。頗思有所維挽。救正於其間。今歲之秋。當路諸君子。毅然廓清風氣。凡屬著才知名之士。多見收採。而靈臯遂發解江南。靈臯名故在四方。四方見靈臯之得雋。而知風氣之將轉也。於是莫不購求其文。而靈臯屬余為序。而行之於世。嗚呼。自余與靈臯兄弟相率。刻意為文。而佗際失志。莫甚於余。回首少時。以至於今日。已多歷年所。所為冥心獨往者。至今猶或貽媿笑。今幸靈臯以其文行於世。而所謂維持挽救正之者。靈臯果與有責焉。而百川之文。亦漸以流布於四方。則四方之士。所為賴以鼓舞振起者。獨在方氏兄弟間。而余亦且持是以間執鄉人之口也。於是乎書。

北行日記序

往余居鄉。以教授糊口。不出一百二里之內。歲得一環兩環。與村學究為曹伍。計四時中。省親一再歸。歸數日即去。雖無安居之樂。亦無行役之苦。後以死喪債負相迫。適督學使者。貢余於太學。遂不得已而為遠役。則始於歲丙寅之冬。距今十五年。往返奔走。徧歷江淮徐泗燕趙齊魯閩越之境。凡數萬里。每行輒有日記。余性懶。不自收拾。往往多散軼。而乙亥之夏。自金陵至燕山。有北行日記付宿松朱字綠。丁丑之春。自燕山反金陵。有南遷日記付祁門汪獻其。已而獻其卒於客舍。其稿無從尋覓。而今年春。字綠自福州來金陵。偶拾北行日記稿歸余。余讀之而嘆曰。嗚呼。客遊

之困未有甚於余而馳驅奔走之無益亦未有如余之甚者也。子路曰：傷哉貧也！生無以為養，死無以為葬也。陶淵明詩曰：飢來驅我去，出門何所之。以余之猶隘，憂憤滿懷，而僕僕於朝市之間，所往而輒躓，固早自知之。然而不能不為此者，誦子路之言，與淵明之詩，其亦可泣然而流涕者矣。易曰：旅即次，懷其資，得童僕，貞。是三者余皆無之。方其始謀出門，多方假貸，經營數月，而後成行。行李略具而已。途中所食皆粗糲，往往閱月不能肉食。舟車之費，皆從節書，猶有資用之絕之患。其於陸行也，余與奴各賃一騎。執鞭者見余書生，則大喜，往往多索其直。一切頗不用命，而騎又多不良。且善驚，雖執轡甚謹，猶時時遭顛仆。行淖中尤危險，往往泥塗被體，衣被盡濕。而逆旅主人，與執鞭者，表裏為姦，每於常直外多索錢。信信張目視，髮盡豎，如其言償之乃已。此在北方為甚。一勺之漿，一杯之酒，非數倍其價不可得也。其於舟行也，舟子尤多桀黠。時時勞之以酒食，乃喜，而余每乘舟，風輒不利。或日行數里，或日行數十里，小舟如葉，坐卧不能伸脊。見他舟之順風行者，甚羨之，而余平生未嘗遇順風，真可怪也。其或資用既竭，不能獨賃一舟，則與述人共賃一舟，所養走卒與夫皆不擇，與之雜處，彼亦引吾為曹偶，喧譁叫罵，其困尤不可一刻安。其行以暑也，雞未鳴即起，及早涼，行數十里，日漸當午，則熱氣薰蒸，喘息皆欲絕。車馬所踐踏，塵土颺

起撲面。目不能開。日晡小飲。食於旅店。食中皆雜塵土。不能擇也。每日行百餘里。而宿西北方無牀。以土為炕。壁蝨之所聚處。逼人肌膚。遂成瘡疔。至於舟行。則不能設帷帳。蚊終夜集於身。以手撲之。血滿掌。唯于冬寒之時。頗以舟行為便。無風雪霜露之侵。而陸行當嚴寒。手足皆僵。如痿痺。冰結於髁。冷氣徹骨。抵暮以厚直買束薪燒之。良久乃得煖氣。肌膚漸蘇。寢纒安。而困人已越之起矣。關津之設也。如密網。商賈之船。皆早已輸稅。餘舟次第進。邏者獐獍。林豆岸上一舟過。輒一人躍入舟。衣被皆開。稅勢如虎狼。舟人皆震恐。雖無絲毫之匿。亦必稍稍賂之。乃去。而西北有響馬賊。樂人於途。懷重資者。惴惴懼不保性命。東南則多竊盜。乘夜為暴。亦或殺人。而余行李蕭然。襆被之外無長物。晝夜幸皆無恐。嗟乎。古之人濡手足。焦毛髮。勞其身。以為天下經營拮据。其勤苦豈特如此而已哉。而余所處不過為一身一家之計。而猶不能遂窮巖斷壑之中。必有高人逸士起而笑余者矣。余之遊四方。以賣文為生。自文體之壞也。是非工拙。世無能辨別。里巷窮賤無聊之士。皆學為應酬之文。以遊諸公貴人之門。然必濟之以狡諂。諛佞。其文乃得售。不然雖司馬子長韓退之復生。世皆熟視之。若無覩。而余性疎慵。頑放。即己亦自厭之。而不能改。宰輔大官相見。一揖之外。無他語。酒酣論世事。咄嗟吁嘻。旁若無人。人頗怪之。然諒余之無他多。不以

禮數相責。而余文章之名故在。四方所至。必有主人。延掌書記。或遣子弟受學。然大抵皆出於耳食。計日傭賃而已。未有行度外之事。而給余養親隱居讀書之費者。而倡優便嬖之徒。居其門下者。輒傾困倒廩以與之。而無所惜。昔白居易為元稹作墓誌。謝文七十萬。皇甫湜作福光寺碑。凡三千字。裴晉公每字酬以一練。湜大怒。以為太薄。以今視昔。文章輕重。風尚美惡。竟何如也。嗚呼。客遊之困。果未有甚於余。而馳驅奔走之無益。果未有如余之甚者也。余性硜硜自守。生平於非道義。雖毫髮不苟取。士大夫中。雖號為深交。平日以文章道義相砥礪。一旦出而連城數百里。世俗所稱美仕。然亦罕有念及憔悴窮愁之故人。以一函來問。卽余未嘗一往謁也。故余也。非賣文更無生計。今且世事愈變。文章更無所售。雖投請說佞之徒。皆易術以去。而余抱區區無用之學。舉世不知之技。以浮沈於遊士幕客之間。所謂操隋侯之珠。而以彈雀者也。至是而愧悔交集。不覺其汗之浹于背矣。前年之秋。老母謝世。方當營一坏之土。與先君子合葬。則為子之事已畢矣。而余年近五十。未有子息。平生欲著書一二種。而購求遺書之費。頗復不貲。今雖稍稍略具。而所購求未備。不敢聊且命筆。恐皆不能成就。將遂舉手謝時人。以去。獨身處荒山中。拾橡糗芋。以終餘年。不復能遠役矣。偶因讀北行日記。而書其志如此。時庚辰二月。

醉鄉記

昔余嘗至一鄉，輒頓然靡然，昏昏冥冥。天地為之易位，日月為之失明，目為之眩，心為之荒惑，體為之敗亂。問之人曰：是何鄉也？曰：酣適之方，甘旨之嘗，以倘以佯，是謂醉鄉。嗚呼！是謂醉鄉也歟？古之人直欺余也。吾嘗歎夫劉伶阮籍之徒矣，當是時，神州陸沈，中原鼎沸，而天下之士放縱恣肆，淋漓顛倒，相率入醉鄉不已。而以吾所見其間，未嘗有可樂者，或以為可以解憂云耳。夫憂之可以解者，非真憂也。夫果其有憂，馬抑亦不必解也。况醉鄉實不能解其憂也。然則入醉鄉者，皆無有憂也。嗚呼！自劉阮以來，醉鄉徧天下，醉鄉有人，天下無人矣。昏昏然，冥冥然，頽墮委靡，入而不知出焉，其不入而迷者，豈無人也歟？而荒惑敗亂者，率指以為笑，則真醉鄉之徒也已。

睡鄉記

睡鄉者，莫知其處。或曰：太初之始，六合之外。或曰：不然是鄉也。在在有之，遊者多至焉。然非善遊者，莫知云。蓋其鄉冥然塊然，無有天地日月，與酬酢往來，以及災祥禍福，是非美惡，榮辱得喪，皆無之。入其鄉者，若忘若迷。凡所為可欣可嗜，可涕可悲，春不能隨之以入，一入其鄉，歟絕。是故善遊者，往往暮睡鄉，嗚呼！睡鄉之境，頑鈍然也。睡鄉之人，枯槁然也。然而其天則全，其神則靈，其體則休，以適世之人，孳孳然汲汲。

然或不暇以遊。而遊者又或往往呻吟哈嚙。噫夫其呻吟哈嚙。必有隨之以入者也。有隨之以入者。而睡鄉之遊不快也。昔者莊周至其鄉。化為蝴蝶。蝴蝶至其鄉。化為莊周。莊周也。蝴蝶也。相化而未。有已也。於是乎睡鄉擾矣。

陳士慶傳

陳士慶河南節州人。當年少時。其族有登科為知州者。其父羨之。教之學書。不成。棄去。與一二道家者遊。聞神仙之術。欣然慕之。乃棄其業。尋父母。出遊名山。冀遇神仙者。流無所遇。已而入函谷關。至終南。有老人。簪冠羽衣。坐石洞中。辟穀久矣。士慶拜於洞口。老人閉目不答。如是者累日。一日。老人出問曰。若何人。乃溷老夫為。士慶曰。吾欲求神仙之術。老人熟視之。曰。徧體皆凡濁。豈神仙中人耶。去。毋溷我。復入洞。閉目坐。士慶又跪且拜者累日。每飢。則乞食村中。一日。老人謂士慶曰。吾知若苦飢。當以餉女。命童子予一物。若飴。食之。氣蒸蒸。然滿腹。遂不復飢。士慶愈益奇之。不肯去。又累日。老人因出一卷書。授之。曰。去。求仙非女事也。士慶拜謝而去。視其書。皆不盡。唯末四紙。頗能識之。皆禁方也。士慶歸。至河南。有巡撫之如鞞。鞭隨地而折。其足。募能治者。予以百金。士慶以其方試之。立愈。乃挾百金以歸。當是時。流寇起關陝。蔓延天下。河南羣盜亦起。其父母相與謀曰。兒不治生產。而好遊。遊且數年。今天下大荒。

旱且亂而兒鷄窮在外。挾金以歸。得毋從賊乎。乃詣友言。牒官因繫士慶。而其族人為知州者。方家居。為請于友而免之。士慶自言得異書。父怒。奪而焚之。士慶急從火中。撮拾。屢存。末四紙而已。居有頃。羣盜破節州。士慶家皆亡。士慶為張獻忠所據。在賊中。依其書試之。煮水成膏。有讒之獻忠者曰。某男子。乃妖人也。獻忠命速斬之。將斬。士慶呼曰。吾有禁方。能使死者復生。獻忠笑曰。姑留之。勿殺。然不之奇也。獻忠性兇殘。每以大挺撻左右。輒死。或付士慶治之。皆立起。獻忠破武昌。楚王死。宮中有婢曰老脚。為獻忠所嬖。一日獻忠召老脚。老脚不卽至。獻忠怒。持刀自往刺之。搃其胸及腹。洞數寸。肝肺腸胃。皆剗然委於地。獻忠旋悔之。召士慶而告之曰。吾固欲殺若。若自言有仙術。能活人。今能活老脚。當賞而死。士慶曰。嘻。烏有肝腸離體而可復生者乎。然不敢違大王之令。當且徐而活之。使人舁一木扉至。卧老脚其上。納肝肺腸胃於腹。以綫紉之。而傅以藥。一日而老脚呻吟。又一日而起飲食。又三日起坐。扉上。又三日而侍獻忠側矣。獻忠由此大奇之。孫可望者。獻忠之平東監軍也。飲酒醉而殺其嬖妾。士慶見之曰。此監軍之最寵者也。醉而殺之。醒必悔之。且洩怒于左右矣。持以去。亦綫紉之。而傅以藥。以衾裹之。置車中。閱一二日。起營數十里下壁。士慶問可望曰。前夜監軍何自殺其愛妾。可望撫膺嘆曰。吾固悔之。士慶曰。吾今復得一

美人以進監軍。監軍無傷也。乃召人持車至。啟衾出美人。卽所殺之妾也。視其項紅痕如縷。美麗倍於平時。可望拜而謝曰。公真神仙也。賊中有驍將祁三昇。臨陣而為官兵削其頰。車折齒。士慶為斷一倖之頰車。以合其齟。一日夜。而飲食言笑無異。獻忠愛將曰。白文選與官兵戰而砲其脛。負痛馳歸。瀕死。獻忠命士慶治之。士慶曰。傷甚矣。治之稍難。吾無子。文選能父我而養我。以終其身。乃能如大王命。獻忠命文選書券如其言。士慶先以藥僵其痛處。鋸去其脛骨寸許。殺一犬。取犬足骨如其長。合之而傅以藥。閱三日而文選馳騎入官軍。斬發砲者頭來。其奇效多類此。其後獻忠死。士慶遨遊。孫可望。李定國。間定國既及政久之。戰敗入蠻徼中。士慶隨之而行。年老矣。曰。猶能飲酒數斗。御教婦人。人求其術。輒不言。曰。此非我所能傳。有司之者。先是獻忠在湖南。破長沙。獻忠謂士慶曰。吾欲號汝為老神仙。而恐軍中不盡知也。今為汝申令于軍中可乎。乃令其兵人持一几來。頃之得几數十萬。獻忠命軍士繫几為臺。高且百丈。教士慶登其巔。士慶愕然曰。吾身不能騰空。焉能躡之而上也。獻忠曰。不登且殺汝。命軍士數十萬人持弓矢環之。且曰。吾有呼則全軍皆呼。士慶登其半欲止。獻忠命軍士引滿擬之。士慶懼而上。遂登其巔。獻忠呼曰。老神仙。軍士皆呼曰。老神仙。聲殷然震山谷。自是賊軍皆稱為老神仙。不知其姓名。而士慶前亦自匿。

其姓名不以告人也。在蠻徼中。蜀人劉莖與之善。許為士慶作傳。乃為告其姓名。及遇仙始末如此。其後士慶隨其養子白文。選入邊投誠。而病死於騰越州。

贊曰。余讀陳士慶事。洵奇怪。然竊嘆其挾異術如此。而為賊用。可惜也。吾又聞降將王安者。自言在賊中時。嘗從神仙聚藥。見其聚羣婦人。剗取其陰上肉方寸。置鑪中。雜以藥熬之。須臾鑪中火起。光滿室中。其火着物不燃。老神仙曰。藥成矣。復投以藥。而火息。然則士慶之術。非為賊亦不能試也。殺人以活人。其術又曷足尚哉。

楊維嶽傳

楊維嶽。字五莫。一字伯峻。廬州巢縣人也。生而孝謹。好讀書。毅然自守。以正嘗以文見知於郡守。一日往謁。逢富民有犯法者。守教維嶽為之代請。可得金數百。維嶽謝曰。犯自有公法。使此人不當罪。而維嶽受其金。則不祥。使此人當罪。以維嶽故。實之。是以私愛而撓公法也。維嶽兢兢自守。懼無以報德。其敢以是為公累。守由是益敬重之。嘗讀書至忠孝大節。往往三復流涕。慕文文山之為人。也。畫像以祀之。崇禎中。陝西盜起。都御史史可法巡撫淮揚。維嶽曰。此當代偉人也。不可以不見。乃徒步詣軍門。往謁。可法故好士。一見奇之。居無何。寇益急。詔天下勤王。時可法已拜南京兵部尚書。尚書以府耗軍資竭。兵不得出。傳檄諭天下捐貲救國。維嶽捧檄泣曰。國事

如此吾何以家為。卽毀家以爲士民倡。而人皆無應者。崇禎十七年。上崩於煤山。維嶽聞之。北向號痛。累晝夜不能寢食。時福王世子卽位南京。改明年爲宏光元年。維嶽條列時務十三事。上陳當事。未一歲。北兵渡江。京師潰。而史可法以大學士督師揚州。城破。死之。維嶽泣曰。國家養士三百年。以身殉國。奈何獨一史公。於是設史公主。爲文祭之。而哭於庭。家人進粥食。麾之去。平日好飲酒。亦却之。曰。踐土而思禹功。食粟而思稷酒。吾家世食膠庠之澤。今值國事如此。飲食好下嚙乎。三日。北兵至。下令薙髮。維嶽不肯。人謂先生曷避諸。維嶽曰。避將何之。吾死耳。死耳。其子對之泣。維嶽曰。小子。吾生平讀書何事。一旦苟全倖生。吾義不爲。吾今得死所矣。小子何泣焉。人有來勸慰。偃臥唯唯而已。搜先人遺文付其子。曰。當護守之。乃作不斃永訣之辭。以見志。凡七日不食。整衣冠詣先世神主前。再拜入室。氣息僅相屬。人來觀者益衆。忽張目視其子曰。前日見志之語。慎勿以示世也。頃之遂卒。是歲宏光元年七月二十九日也。年五十有六。聞者莫不爲之流涕。私謚爲文烈云。

贊曰。嗚呼。遭時亂亡。士之自立。可不慎哉。三代以來。變故多矣。爲人臣者。往往身爲大官。不能爲國死。而布衣諸生。又以死非吾事。則是無一人死也。君臣之義。幾何而不絕也哉。自古死節之域。莫如建文之時。而姓名半且磨滅。吾嘗惜之。迨甲申乙酉。

間天下又非靖難比也。故余所至輒訪問父老有死事者為紀次之無使其無傳焉。而龍舒山中余有門人曰余生為我道貢士楊維嶽事。余嗟異之。已而觀其子弘抱所作家狀良然遂為論次如此。

王養正傳

王養正字聖功一字蒙休。鳳陽泗州人也。舉崇禎戊辰進士官至建昌兵備副使。乙酉大兵破建昌。養正被執不屈死。養正自成進士至乙酉死國難中間凡十八年。其宦遊大半在江西。而江西號文章節義之鄉。一時名宿如姜日廣袁繼成楊廷麟黃端伯皆天下有道高明之士。養正嘗從之遊。養正授海鹽令。以父喪不果行。服闋知秀水。秀水大縣。田六十一萬八千餘畝。豪有力者多據沃壤。隱丁賦而貧弱者往往困徭役。養正為之正經界。均田賦。賦役始平。而豪有力者以是側目。遂中傷。養正左遷以去。亡何陞襄陽府推官。是時羣盜張獻忠馬守應等引眾數十萬據穀城。偽降于制府熊文燦。文燦信之。全楚兵吏皆以為不可。文燦不聽。養正出入賊中。知賊降非實。不敢與撫賊功。已而賊果叛。久之遷刑部主事。再晉員外郎。是時天子綜核羣臣。端愼。每有大獄輒懸揣意旨。或持兩端相避就。不敢爭。而養正獨多所執奏。奉命恤刑江西。巡歷十三郡。多所平反。既還朝。擢知南康府。九江土賊鄧毛漢熊高聚眾。

山谷間。南康人恒懼議請兵。養正移疾閉閣臥。陰遣間說鄉兵殺賊。居數日。賊盡滅。暇時輒與諸生講論道義。修復白鹿洞學舍。黃端伯與養正同年友善。設精舍廬山下。日與往復議論。諸生多所興起。甲申春三月。李自成犯京師。烈皇帝死社稷。南中立君。是為安宗皇帝。以養正備兵建昌。養正抵建昌。部署既定。而

大清兵已渡江。遣降將金聲桓定江西。江西諸郡皆望風靡。養正飲泣誓師。堅城拒守。聲桓遣其精兵來攻。養正以鄉兵敗其前軍。會所徵滇兵叛內應。因襲陷建昌。執養正。養正不屈。因執之赴武昌。見主兵者。過南康。南康人號泣隨之。養正謝曰。父老良苦。然吾有死所矣。臨難之日。主兵者再三說養正使降。卒不屈。奮號大罵。遂死。時乙酉八月二十一日也。是年黃端伯盡節於南京。明年袁繼威死於燕市。楊廷麟守贛州。城破死。又二年。姜日廣起兵南昌。戰敗自殺。

贊曰。余嘗讀先生詩文。蓋其孫贊化所刻四逸圖集者是也。余既已為之序。而復書其事如此。嗚呼。淮泗之間。高皇帝之所以起也。當其初起。雲蒸龍變。一時將相皆出於其間。而及其亡也。一二孤忠間出。斷脰決腹。一瞑而萬世不視。觀明之所以興與其所以亡。而淮泗之盛衰。亦可考見焉。

劉孔暉傳

劉孔暉字默菴先世廬陵人其大父遊楚之邵陽因家焉遂為邵陽人孔暉事親孝謹而與其兄伯相友愛幼時以兄詣塾師學書課已畢而見其兄課不能竟則伏几泣師詰之以實對師喜每稱其友愛純至以勵他子弟天啟辛酉舉於鄉明年計偕入京師道聞兄疾即反侍湯藥勿懈久之兄死而其母亦相繼卒孔暉喪盡哀見者皆為感動楚人多稱之孔暉起家為龍陽教諭巡撫御史林鳴球知其賢遂表為縣得河南之新鄭當是時羣盜起關隴蔓延豫楚之間張獻忠已破襄陽李自成擾中原河南大亂孔暉從間道抵新鄭新鄭城且頽歲復凶人民多逃徙或教孔暉棄城走民寨自全賊勢甚盛毋死守空城為也孔暉謝曰朝廷不以孔暉為不肖待罪茲土縣存亡即孔暉存亡敢逃死乎於是修城垣浚隍城守略具而自成兵且至賊呼城上人速降且獻官與印不然城且屠孔暉繫印於脰登城守禦而賊來益衆縣人洶洶欲走無固志有富豪縋城降賊求生孔暉執而斬之而賊已斬南關入焚掠倉庫誰樓皆毀縣人皆走孔暉大呼百姓巷戰賊無有應者賊射孔暉中臂墜城而賊賊尋去圍人張賀等昇至民家燒湯灌之閱二日而魁移文上官言孔暉旦暮且死請急遣官來署縣事且收印巡撫高名衡不可於是孔暉仍城守如故賊復引衆至執孔暉賊見印右脰間折臂取印去執至朱仙鎮見自成不屈遂遇害從者圍人馮

三立亦感憤罵賊死其僕劉庭及門人鍾寬楊芳皆從孔暉殉難是為崇禎壬午正月十二日也賊移兵攻汴新鄭人收其骸骨歸葬於楚天子聞之贈尚寶寺卿廢一子入監祀鄉賢

贊曰自古盜賊之禍莫烈於明然明之羣盜最為驚下非實有絕人之略觀視天下之志也起飢寒聚羣不逞一折莖可制而國家以畏死無能之書生當之宜其敗也前後建丹大吏皆不難捐天下以與賊使能如新鄭令以一城效死弗去賊之禍豈至是耶故余讀先生之事輒不禁三復而嘆息也

一壺先生傳

一壺先生者不知其姓名亦不知何許人衣破衣戴角巾佯狂自放嘗往來登萊之間愛勞山水輒居數載去久之復來其踪跡皆不可得而知也好飲酒每行以酒一壺自隨故人稱之曰一壺先生知之者飲以酒即留宿其家間一讀書戲教流涕而罷往往不能竟讀也與即墨黃生葉陽李生者善兩生知其非常人皆敬事之或就先生宿或延先生至其家然先生對此兩生每瞠目無情輒曰行酒來余為生痛飲兩生度其胸中有不平之思而好自放于酒嘗從容叩之不答一日李生乘馬山行望見桃花數十株盛開臨深溪一人獨坐樹下心度之曰其一壺先生乎比至果先

生也。方提壺飲酒，下馬與先生同飲，醉而別去。先生蹤跡既無定，或留久之，乃去。去不知所之。已而又來。康熙二十一年，去卽墨久矣。忽又來居一僧舍。其素與往來者視之，見其容貌憔悴，神氣惘恍，問其所自來，不答。每夜半，卽放聲哭，哭竟夜，閱數日，竟自縊也。

贊曰：一壺先生，其補鍋匠雪菴和尚之流亞歟。吾聞其雖行，適當酒酣大呼，俯仰天地，其氣猶壯也。久之，忽悲憤死，一瞑而萬世不視，其故何哉。李生曰：先生卒時，年已垂七十。

竇成傳

竇成者，蜀人也。崇禎中盜起，自涇池渡河，奔突江淮，汝洛湘湖之間。當是時，成仗劍從軍，為小卒，無所知名。崇禎八年，流賊陷中都，圍桐城不下。桐為四通之道，賊往來豫楚，濠泗必由桐。安慶巡撫遣其將廖應登領兵三千人戍桐，成與焉。成多髯，軍中稱曰竇髯。為人好義，善飲酒，其戍桐也，縣中百姓多喜與之遊。歲壬午冬，成從應登往謁巡撫史可法於廬州。至舒城解鞍休馬，遇張獻忠兵，皆被縛，當是時，江北諸郡縣相繼皆屠滅，獨桐城圍不能破。至是，賊文益急，縣中設守備，出奇兵擊賊，賊多死，賊計無所出，乃挾應登，誘降其步卒，因遣成至城下，獻忠使二賊隨之，成仰首呼

城上守兵曰：我實成也。賊使我招降若等，若等宜堅守。今賊計窮矣，若等努力無懈，且速請兵來援我死矣。我死以活若等及縣人。二賊怒，拔刀刺之。成至死，猶大呼不絕。賊凡攻圍且數十日，縣中洶洶謂城旦夕破，莫知所為。及聞成語，士皆起，人人具香焚之。煙縷起屬天，相與望城下，流涕而拜。因守益力，使人間道請救于總兵黃得功。得功引兵來救，賊大敗走楚。縣人立祠于城內西山之麓，祀之。成死之日，是為歲壬午十一月二十一日也。應登既陷，賊殺之於沙河，其三千人屬於孫羅二將，仰食民間。已而城內食匱，剽掠郊野，大兵至悉散去。執兩將至江寧，殺之。

贊曰：余嘗至竇公祠，拜其像，慨然流涕者久之。嗚呼！賊蹂躪偏天下，而吾縣以孤城懸守，猶得父子兄弟相保也。苟可忘其所自耶？當此之時，健牙大吏，其不為賊用者少矣。國家之敗亡，庸獨羣盜之罪乎？殺身成仁，得之戍卒，可敬也。夫可悲也夫。

儀真四貞烈合傳

崇禎甲申春三月，流賊李自成犯京師，烈皇帝崩於萬歲山。西北諸將多擁潰兵渡河而南，諸將惟高傑兵最強。傑本降將，其兵故賊也。所至恣淫殺無忌。四月晦，傑前軍抵揚州之儀真縣，縣人設守。而城外居民倉卒不及避，多罹寸禍。五月望，靖南侯黃得功引兵駐儀真，亂乃定。於是有四貞烈婦事傳於世，其一為補傘婦，不知其姓。

名其夫以補傘為生居西城外賊至其夫棄婦逃賊挾婦以行婦無懼色隨行至一橋橋中斷而橫一木為渡婦佯懼曰予婦人安能渡此若負我以行其可也賊曰諾即負渡橋婦佯懼遂巡賊背而持之甚力至橫木上婦人大呼奮身一躍與賊俱墜水中賊力自奮起而為婦所持岸上賊夾河而視欲擊婦恐更傷賊相與語莫知為訃而賊屢浮屢沈久之遂俱沒而南城外有諸壩相環接壩皆有橋其三壩之橋曰飛虹距運河半里許其下湮而橋上遂成市肆蓋有木工居焉賊至居人皆走而木工亦棄其妻與幼子去賊謂婦曰毋懼隨我行作我家婦復拔刀擬之曰不且殺女婦乃扶幼子行至運河側抱其子赴水死已而夫循運河行覓之見屍浮水上幼子在母懷如故距城四五里道旁有一井井深丈餘水半涸有二賊過井上渴謀汲飲俯視之一婦人匿焉二賊喜謂婦曰女更無可逃盍上而從我婦曰不能自上幸井不甚深必一人下按我上在上者更挽之乃可復上不然終不能上也於是一賊躍而下以肩為梯而推婦使上婦既上在上者更俯首下引賊婦乘其不備按其頸而奮力擠之遂亦下井固狹二賊顛倒井中婦因取井旁石並土擊而填之乃奔靖南侯之駐儀真也兵與民頗相安縣無賴者貪兵之貨多以女適兵仇儒失其所者不可勝數有貞女黃氏其父本微賤無行而母又早死女年及笄有美色其父與媒

的謀曰。軍中苟不惜貨財。吾無所惜。吾女於是兵來視者紛紛。父告貞女曰。此百夫長也。又曰。此千夫長也。又曰。此為參將。為游擊。行且為元戎矣。已而一兵來納采。父謂貞女曰。女有行日矣。他日富貴。勿而翁是忘。貞女唯唯。越數日。貞女知期已近。乃藏衣裳為容貌。其父不之疑也。而貞女遂乘間自縊。死。縣諸生高配。天聞而嘆曰。嗟乎。為此女者。亦良難矣。欲逆父。則不孝。欲從父。則失身。匪人欲正告父。知父終不可悟。欲斷于未納采之前。則父之貧尚未饜。欲先以已意告人。則恐不得遂厥志。若貞女者。可謂正而有禮。智而守義矣。因為歌以弔貞女。及三烈婦焉。其辭曰。

名媛天產兮。下處蓬蒿。一行卒志兮。復何畏乎。強豪身因辱於亂離兮。恍更若得遂。適其逍遙奮不與賊俱生兮。豈竊慕乎名高弄聲。賊若嬰兒兮。更快心於寸磔之市。朝若乃彼以禮將。此以禮命。似可不同於劫賊兮。何輕一死之等於鴻毛。是其立志不欺。知勇性成也。故茲三婦一女。前後一轍也。辭曰。氣撼日星兮。噴江湖。智移山嶽兮。邁孫吳。蘭芷之幹。而亦可以插膏。漢兮。至風稱捉捉者。乃忽萎而靡。燕鳴呼。嗚呼。余是可以不哀兮。羌不知見危之薦紳耆老。其何如。再歌曰。雲天兮。蒼蒼。烟水兮。茫茫。山林深兮。虎豹藏。太極高兮。鸞鳳翔。四海溟溟兮。波瀾澎湃。而不同其汪洋。千古浩浩兮。往往更代。而時著其嘉臧。中有一德兮。歷百變而益光。不本於學問兮。而不

由乎文章獨斷自性情兮。而獨標其芬芳。魂兮魂兮歸何方。魂兮魂兮與所望。魂兮紛不可以久留兮。我心皇皇。庶幾未足以家兮。胡海莫可以房。蛇豕青赤。蛟螭黃淵。嶂杳冥兮。豐草長。上帝降言兮。遠近將。玉琴寶瑟兮。舞霓裳。紫龍青輦兮。從風。風西母兮。降康。羣娥兮。鳴璫。酬酢錯兮。百社翔。獨下土兮。失姬姜。姜不見。使我傷。躑躅終宵。怨上皇。時向天門思帝鄉。霞氣朝流。逸日旁。驅光逐影。穿窮巷。爲兔奔飛。匆忙忙。有美彷彿。坐高堂。心知和樂兮。悅未央。

畫網巾先生傳

順治二年。既定江東南。而明唐王卽皇帝位於福州。其泉國公鄭芝龍。陰受督師洪承疇旨。棄關撤守備。七閩皆沒。而新令薙髮。更衣冠。不從者死。於是士民以違令死者。不可勝數。而畫網巾先生事尤奇。先生者。其姓名爵里。皆不可得而知也。搗僕二人。皆仍明時衣冠。匿跡於邵武光山寺中。事頗聞於外。而光澤守將吳濟。使人掩捕之。逮送邵武守將池鳳陽。鳳陽皆去其網巾。留於軍中。戒部卒謹守之。先生既失網巾。盤櫛畢。謂二僕曰。衣冠者。列代各有定制。至網巾。則我太祖高皇帝創爲之也。今吾遭國破。卽死。詎可忘祖制乎。汝曹取筆墨來。爲我畫網巾額上。於是二僕爲先生畫網巾。畫已。乃加冠。二僕亦互相畫也。日以爲常。軍中皆譁笑之。而先生無

姓名人皆呼之曰畫網中云當是時江西福建間有四營之役四營者曰張自誠曰洪國玉曰曹大鎬曰李安民先是自誠隸明建武侯王得仁為裨將得仁既敗死自誠亡入山與洪國玉等收召散卒及羣盜號曰恢復眾且踰萬人而明之遺臣如督師兵部右侍郎揭重熙詹事府正詹事傅鼎銓等皆依之歲庚寅夏四營兵潰於邵武之禾坪池鳳陽說稱先生為陳俘獻之提督楊名高名高視其所畫網中班班然額上笑而置之名高軍至泰寧從檻車中出先生謂之曰若及今降我猶可以免死先生曰吾舊識王之綱當就彼決之王之綱者福建總兵破四營有功者也名高喜便往之綱所之綱曰吾固不識若也先生曰吾亦不識若也今特就若死耳之綱窮詰其姓名先生曰吾志未能報國留姓名則辱國智未能保家留姓名則辱家危不能即致身留姓名則辱身軍中呼我為畫網中即以此為吾姓名可矣之綱曰天下事已大定吾本明朝總兵徒以識時變知天命至今日不失富貴若一匹夫倔強死何益且夫改制易服前世已然因指其髮而詬之曰此種種者而不肯去何也先生曰吾於網中且不忍去况髮耶之綱怒命卒先斬其二僕羣卒前捧之二僕瞑目叱曰吾兩人者豈惜死者顧死亦有禮當一辭吾主人而死耳於是向先生拜且辭曰奴等得侍掃除泉下矣乃欣然受刃之綱復謂先生曰若豈有所負耶義死雖亦佳何

執之堅也。先生曰：吾何負？負吾君耳。一籌某劾而束手就擒，與婢妾何異？又以此易節烈名。吾笑夫古今之循例而起義者，故恥不自述也。出袖中詩一卷，擲於地，復出白金一封，授行刑者曰：此樵川范生所贈也。今與汝遂被戮於秦寧之杉津。秦寧諸生謝蹕韓，葬其骸於郭外杉窰，題曰：畫網巾先生之墓。而歲時上塚，致祭不輟。當四營之既潰也，楊名高王之網復追破之，死傷略盡。而敗將有願降者，率兵受招撫於邵武，行至朱口，一卒獨不肯前，伸項謂其伍曰：殺我殺我，其伍怪之。且問故，曰：吾熟思之，某日夜矣，終不俯仰事降將，寧死汝手。其伍難之，乃奮袂裂裳，抽刃相擬，曰：不殺我者，今當殺汝。其伍乃揮涕斬之，埋其骨而去。揭重熙傳鼎鉉，先後被獲不屈死。張自盛、曹大鎬等，後就縛於瀘溪山中。

贊曰：自古守節之士，不肯以姓氏落人間者，始於明永樂之世。當是時，一夫守義而禍及九族，故多匿跡而死，以全其宗黨。迨崇禎甲申而後，其令未有如是之酷也。而以此余所聞，或死或逸，不以姓名里居示人者，頗多有。使弔古之士，莫能詳焉，豈不可惜也。夫如畫網巾先生事，甚奇，以當時軍中有馬糧圍者，見而識之，是為馮生舜也。至其他生平，則又不能言焉。余疑其出於附會，故不著於篇。

范增論

定天下者必明於天下之大勢。而後可以決天下之治亂。天下之治亂。勢為之也。勢可以治矣。而復至於大亂。此不明於勢之過也。今夫勢有可行。有不可行。視乎所遭之變。所遇之時。而勢出乎其間。是故順其勢而趨之。則勢在我。而天下唯吾之所奔走。而莫吾難。而不然者。勢且一失。而不可復救。嗚呼。此項籍所以有取天下之勢。而終於無成也。歟。昔者天下苦秦之暴久矣。自周之衰。諸侯並爭。而秦以虎狼之心。破滅六國。其無罪於秦而亡者。不獨楚也。天下含恨蓄怒。特以劫於威強。而不敢動。及陳勝吳廣起於大澤之中。山東諸侯並起。雲翔鳥集。轉而攻秦。而秦以積威之餘。開關出戰。諸侯起於匹夫。其勢不足以相敵。往往糜碎敗衄。當此之時。項籍以啗啜叱咤之資。拔山蓋世之氣。所當者破。所擊者服。卒能入關破秦。以快天下鬱鬱之心。於是政由籍出。分裂天下。而封王侯。莫不北面俯首。唯唯而聽命。則天下之勢。固已在於項籍矣。使籍據其勢。而帝制自為。以號令天下矣。天下方快秦之亡。而服籍之功也。勢不能不聽。以羽之雄。而不知為此者。非不知為此也。其心輾轉自思。無以處義帝故也。彼義帝者。素無功伐。豈唯項籍不用其命。天下諸侯亦未有用其命者。項籍勢足以臣諸侯。而義帝勢不足以臣項籍。項籍况臣於義帝。則其勢不能以臣諸侯。此義帝所以死。而項籍之所以亡也。秦漢以後。天下之變故多矣。蓋有其國。既失其

宗廟既廢而養於亂賊之手者。而其流風餘思未斬於世。天下之人猶有不忍忘之心。於是紛紛而起。輒歸其名號於先朝後。其為名也。正其為義也。順是故不踰時而天下平。此亦自然之勢也。今夫楚之與燕齊三晉也。非有君臣相臨之素圖。匹敵之國也。其盛也。皆南面而稱王。其敗也。皆囚虜而被戮。楚之人不忘其先。詎燕齊三晉之人。遂忘其先乎。今也立義帝以帝楚。即以帝燕齊三晉。吾知燕齊三晉之不心服也。况以牧豎無能之人。而御天下之豪傑哉。吾考其時。周雖衰。天下之共主也。立周之後。以討秦之罪。奉周之命。以臨制天下之諸侯。此天下之大義也。而非天下之大勢。何以明其然也。周自春秋以降。其孱弱已甚。萬乘之國。七千乘之國。五海內爭於戰攻。周且臣屬於諸侯。天下之人不知更有周也。以為周亡久矣。秦之吞天下。先及周。又數十年而後。及六國。是故周不可以復興也。固也。其澤已斬。而其迹已熄。其勢已去矣。當此之時。苟有人焉。崛起誅暴秦。修先王之法。拯元元之命。其義已無愧於湯武。是則天下之勢。不必其在諸侯後也。彼義帝之立。為何義也哉。史言范增素居家好奇計。教項梁立楚後。梁從之。嗚呼。吾未見計之奇也。而項氏之亡。實由於此矣。增之言曰。陳勝敗固當。陳勝首事。不立楚後而自立。其勢不長。然而義帝之立。無救於項梁之死。而秦之所以破者。項藉與諸侯之力。義帝非有毫髮尺寸之功也。然則

義帝之立不立無繫於天下之利害而項氏之亡實由於此矣嗚呼項籍勢足以臣諸侯而義帝勢不足以臣項籍項籍既臣於義帝則其勢不能以臣諸侯於是而遣之而殺之此亦必至之勢也而已投天下諸侯以辭矣彼見項王可以背義帝則己亦可以背項王向之俯首畏服者一旦攘臂而與之抗而項王固無以令於天下矣司馬遷以背關懷楚為項王罪似也然吾以為項王之意非懷楚也特以義帝在楚而心忌之以故舍關中而都彭城思所以翦除之焉耳當其分天下立諸將為侯王項王欲自帝則有義帝在也既王諸將而已亦稱王則無以自別異於是立號為西楚霸王蓋其情見勢絀支吾甚矣然則義帝之立不立無繫於天下之利害而有關於項氏之存亡豈不然哉彼范增者項氏骨鯁之臣也其勸羽殺沛公羽不聽則羽之過也其立義帝則可謂不明於天下之大勢者也漢王與酈食其謀撓楚權食其請復立六國後世張子房以為不可由此觀之夫有所立以自輔且不可乃欲有所立以自制夫豈明於勢而熟於計者哉嗚呼勢有可行有不可行視乎所遭之變所遇之時而勢出乎其間吾獨惜夫後之舉事者有可以用增之計而不能用而自取滅亡為天下笑而增用之楚而項王又以失其天下嗚呼苟非明者烏能觀勢之所在而圖之以定天下之大計也哉

魏其論

魏其與武安以灌夫事相親。天子卒從武安議殺灌夫。兼殺魏其。天下至今憐之。然吾未嘗不嘆兩人之愚也。夫君子處亂世不幸而遇小人遠之亦死近之亦死而吾謂遠之猶可以得生彼小人見君子一切與己乖異固已欲殺君子。吾遠其蹤跡而嫌隙不開警歎不露彼漸且輕忽我也。但得彼之一輕忽我而我乃得脫矣。彼魏其灌夫之死為何名哉。當魏其失勢家居賓客故人皆去默默不得志而灌將軍亦失勢兩人意相憐回思曩者震耀一時奔走天下豈異丞相。今兩人積不平而丞相握重權天下士郡國諸侯皆附之而灌夫以丞相戲弄之言告魏其魏其與夫人市牛酒設張具必欲得武安一往豈其慕豔武安而亦如天下士郡國諸侯以其顧盼為重耶。迨丞相請田而又責望區區一田之為郝者何也。既有郝矣而又強灌夫與俱往賀丞相是亦猶前日慕豔之意且不肯遠得過丞相之意耳。而兩人之首已殞於杯酒之間矣。夫小人之不可近如豺虎然而加之以得勢即附之者亦不能免其禍而况魏其之沾沾自喜灌將軍之好氣懷不平之心嫌隙既開而又為之且前且却於其間宜其及也太史公曰魏其誠不知時變灌夫無術而不避吾推其故皆由於不忍決絕而遂以身殉之悲夫。

讀揚雄傳

揚子雲亦漢家文章之豪也。其不為章句訓詁而默然好深湛之思。余嘗賢之。然亦嘗嘆之矣。夫所貴於學者。為能成一家之書。而前後不必相同。彼此不必相勝。以各出其機樞。而勿詭於古人而已。方雄之少年。慕司馬相如之賦。輒擬之。以為式。而屈原之離騷九章。皆忠臣愛君惓惓之意。雄乃以遇不遇命也。何必湛身哉。因據離騷而反之。又旁離騷作重一篇。名曰廣騷。又旁惜誦以下至懷沙一卷。名曰畔牢愁。夫離騷不必廣也。亦不可反也。離騷可反。而莽大夫亦可為矣。後又以經莫大於易。作太玄以擬之。傳莫大於論語。作法言以擬之。相與倣依而馳騁。何其不自度量至此也。彼直以區區文字。摹倣倣效。而遂為可以入聖人之列。亦謬甚矣。後之論者。怒其專莽。以為不得已而為之。臣既已為之。臣矣。豈不得已之可以釋其罪哉。而且謂其為三代以後大儒。幾比於孔子孟子。即一二人先生。亦不免為是說。徒為其太玄法言所欺耳。而當是時。桓譚之論文者。吾有取焉。譚之言曰。凡人賤近而貴遠。親見其稜位容貌。不能動人。故輕其書。然則庸耳俗目。其愚無知如此。悲夫。蓋由來久矣。而劉歆以後人之覆瓿為憂。夫至後之人。則已不復覆瓿。覆瓿者。當其世耳。吾乃以知古作述之家。其孤危大抵皆然也。因識之於傳後。

錢神問答

有神色赤而目方刺其面為文立中衛莫達於遠眾皆拜祈請甚篤或咄咄嘆息不已戴子見之曰此何神也眾曰非若所知前問神神具以名對戴子笑曰吾聞汝久矣汝固若是者耶其何以動眾如是甚也神曰吾行遊天下靡人不畏罔敢不恭子顧且云云豈有說乎戴子曰吾教汝之罪則銘汝使化而毒未歇銷汝使折而害無救也神怒曰余固知孺子不足憐今偶相遭而眾辱我且夫吾之為功也溥海內外苟非余則滅滅嗟嗟窘然而無以生一二迂妄者吾避去自餘諸公貴人皆孽孽慕余手摩而目覩及庶民卑賤之流無不願為我死者且夫吾之為質也流轉而不窮歷久而不壞愛我者歸之不愛我者謝勿任吾豈有求於世哉世求我而已耳是故官交非吾不樂商賈非吾不通交遊非吾不厚文章非吾不貴親戚非吾不和有吾則生無吾則死是故資我者縣官有禁牟我者錙銖不遺誠明夫利害之分而審夫得失之勢也子何以云爾乎請勿復敢見子矣戴子曰固也吾試且略言之昔者生民之初渾渾噩噩千百年間耕田鑿井衣之食之天下太平安樂無事當是時豈有汝哉自汝出而輕重其制銖兩其名方圓其象流傳人間惑亂其志萬端俱起於是庸夫之目皆以汝為重輕奸人之手皆以汝為上下或執鞭乞哀流汗相屬不然設

心計。走坑險。崇死僥倖。損人益己。互相攘奪。或至犯科作姦。椎牛發塚。聚為博奕。出為盜賊。至於官之得失。政以賄成。敲骨吸髓。轉相吞噬。而天下之死於汝者。不可勝數也。挺土刻木。以為人而強自冠帶。羊狼狼貪之徒。而恣侵暴。夸窮孤。而汝之助虐者。不可勝數也。且又攝其絨膝。固其扁鎖。兀然置於小人暴客之室中。釀爭而藏垢。避正而趨邪。使夫義士仁人。瞿瞿然慄慄然。不能出氣。修德益彰。有文益困。而汝獨紛紛然奔走天下。顛倒豪傑。敗壞世俗。徒以其具薰蒸海內。氣之所感。積為迷惑之疾。見之者。蒸聞之者。思得之者。喜。失之者。悲。有無不平。貪吝接踵。而充塞仁義。障蔽日月。使天下悵悵乎無所之。而惟汝之是從。神曰。子言固然。然余之道。此乃其所以為神也。汝烏足以知之。汝烏足以知之。因仰而嘆。嘻笑而却走。神目四顧。舉手而別。眾共擁之以去。

盲者說

里中有盲童。操日者術。善鼓琴。鄰有某生。召而弔之。曰。子年幾何矣。曰。年十五矣。以何時而眇。曰。三歲耳。然則子之盲也。且十二年矣。昏昏然而行。冥冥馬而趨。不知天地之大。日月之光。山川之流峙。容貌之妍醜。宮室之宏麗。無乃甚可悲矣乎。吾方以為弔也。盲者笑曰。若子所言。是第知盲者之為盲。而不知不盲者之盡為盲也。夫盲

者苟當盲哉。吾目雖不見而四肢百體均自若也。以目無妄動焉。其於人也。聞其音而知其姓氏。審其語而知其是非。其行也。度其平險。以為步之疾徐。而亦無顛危之患。入其所精業。而不疲其神於不急之務。不用其力於無益之為。出則售其術以飽其腹。如是者。久而習之。吾無病於目之不見也。今夫世之人。喜為非禮之貌。好為無用之觀。事至而不能見。見而不能遠。賢愚之品不能辨。邪正在前不能擇。利害之來不能審。治亂之故不能識。詩書之陳於前。事物之接於後。終日觀之而不得其義。倒行逆施。佞佞馬蹟且蹶而不之悟。卒蹈於網羅。入於陷阱者。往往而是。夫天之愛人甚矣。子之以運動知識之具。而人失其所以子之之意。輒假之以陷溺其身者。豈獨自哉。吾將謂昏昏然而行。冥冥然而趨。天下其誰非盲也。盲者獨余耶。余方且睥睨顧盼。謂彼等者。不足辱吾之一瞬也。乃子不自悲而悲我。不自吊而吊我。吾方轉而為子悲。為子吊也。某生無以答。問詣余言。余聞而異之。曰。古者瞽史教誨。師義賦賦。矇誦。若晉之師曠。鄭之師慧是也。茲之盲者。獨非其倫耶。為記其語。庶使覽之者知所悅焉。

薛大觀傳

薛大觀字爾望。雲南昆明人。其先江蘇無錫人。洪武中遷雲南。大觀之妻曰楊氏。生

子二女。其長子曰之翰。之翰之妻曰孟氏。大觀父子為諸生能文章。重然諾。以氣節重於滇南。崇積。乘盜張獻忠等陷蜀。邑而大兵討張獻忠。破殺之於鹽亭。其將孫可望、李定國等走滇。滇人多附可望得官。而大觀父子名士。或勸之出。大觀曰：此孫氏之官。賊官也。余義弟為當是時。永明王即帝位於廣東。可望陽臣永明。實不用其命。而李定國與可望共迎帝入滇。可望走北降。滇人之前不附可望者。皆爭出自表異。或又勸大觀。大觀曰：此李氏之官。非明官也。於是擊家隱居城北之黑龍潭。潭上有觀。曰龍泉觀。有樓曰魚樓。大觀父子讀書其間。哲弟出。歲戊戌。清兵破李定國軍。沒尋至滇。帝出奔於緬甸。大觀聞之。嗚咽流涕。謂之翰曰：國君死社稷。臣死君。義也。今日之事。雖天命。不可以力爭。願獨不可效死一戰。乃崎嶇域外。依小夷求須臾活。豈可得乎。吾書生不能徒手搏敵。計惟有一死。汝其勉哉。之翰泣對曰：父為國死。兒安能不為父死。大觀曰：汝死誠善。第汝母及汝妻皆在。將奈何。當是時。楊氏孟氏皆在旁。乃曰：君父子為國死。吾姑婦獨不能為君父子死耶。而旁有婢曰：鎖兒者。抱大觀幼子在懷。聞諸人語。乃前曰：主等死有名。婢子何以處。此婢子死亦可乎。大觀曰：婢為主死亦義也。於是相率登魚樓。大觀夫婦上坐。子婦拜。鎖兒亦拜。拜畢。攜手下樓。俱赴黑龍潭。死之明日。屍相牽浮水上。幼子在婢懷。兩手抱如故。道旁人舉而

瘞之。先是大觀之女適同縣鄒生。是日隨其夫避亂西山。距魚樓數十里。兵至火起。其夫復他逃。女曰。嗚呼。吾一婦人。將安逃。脫辱身非義。不如死也。遂赴火而死。贊曰。自神廟以來。天下多故。行間大吏計惟有逃耳。一逃而廣甯失。再逃而流寇搗。又逃而金陵亡。而閩亡。而滇黔亡。嗚呼。東南諸帝之死。視烈皇帝之死。為何如也。大觀諸生以其家死無子遺焉。余讀其臨死之語。尤悲之。

曹先生傳

曹先生。桐城人。逸其名。維周其字。家距樅陽十餘里。樅陽者。濱江之市也。左右環之者。重山疊嶂。而曹先生少讀書山中僧舍。為童子師。崇禎十七年三月。流賊李自成陷京師。烈皇帝崩。先生是時年未滿二十。聞之痛哭。即散遣其徒去。終身未離僧舍。距其家僅數里。未嘗一日歸也。為僧種菜。僧食之。以酬其傭工。僧之易者。前後數十人。而先生在僧舍種菜如故。聞有客至。輒避匿不與言。灌畦之暇。時時取書讀之。或有人問之者。爾傭工固知讀書乎。答曰。吾不知讀書也。第能識字而已。鄰里鄉黨皆莫知有曹先生之高節。其族有一士人。投徒於縣中。余往問之。曰。吾伯父行也。今已垂七十有餘矣。

贊曰。曹先生一布衣。遭國破。遂棄其家。終身為人傭工。以死彼受人。主知遇得富貴。

而反顏事仇者。視先生何如也。吾縣士大夫當革命之際。不仕者雖多。而若節獨有一曹氏。

楊劉二王合傳

楊畏知字介夫。陝西臨潼人。劉廷傑字霞起。福建上杭人。而王運開。運宏。所謂夾江二王兄弟者也。崇禎庚午。畏知舉於鄉。庚辰。召試。授戶部主事。累遷。洱海道副使。廷傑以貢士通判永昌。皆滇屬。云當是時。永昌推官為王運開。運開以進士起家。而其弟曰運宏。崇禎壬午舉人也。運宏以蜀亂。亦攜其家從。凡居永昌。崇禎中。陝西羣盜起。天下大亂。而滇以僻遠得脫。承平且三百年。其當麗擬於中原矣。黔公世守滇南。十餘傳而至沐天波。天波自年少。政出多門。諸土司時時欲叛。天波不知也。乙酉秋七月。吳必奎反。冬十二月朔。沙定州反。襲破滇。天波走楚雄。明年沙定州自將兵圍天波於楚雄。當是時。洱海道楊畏知駐楚雄。永昌推官王運開亦適以他事至。相與嬰城守。定州不能破。而使其將李日芳攻大理。王朔攻蒙化。皆陷之。天波懼。又走永昌。明年張獻忠死於蜀。其平東將軍孫可望。安西將軍李定國。率其餘黨。收潰卒。由蜀入貴州。聞滇亂。遂引兵襲滇。破之。沙定州敗走。明年孫可望西略地。且及楚雄。畏知奮曰。可望國賊。罪大惡極。豈可坐而待其至乎。率兵千餘人。迎戰於綠豐縣之啟明。

橋兵敗自投水中。可望素聞畏知名。使人救之。起再三說畏知使降。畏知不肯。痛哭死甚哀。可望曰。公無自苦。公志在尊明。吾亦且歸正。與復明室。公盍留此身。與吾濟大事。奈何死也。可望因折箭為誓。畏知乃喜曰。爾既與吾翼輔王室。則自今請勿殺人。勿焚廬舍。勿淫人子女。可望遂下令軍中如其言。以故迤西諸郡雖不守。而皆無屠殺淫掠之慘者。畏知之力也。可望尋至大理。使人招天波於永昌。天波被降。索諸司印與俱。而是時通判劉廷傑署郡守。推官王運開署參議。兩人正色告天波曰。吾曹之官。皆權攝也。其印何敢與公爭。然印在吾而與公以降賊。是吾兩人亦降賊矣。吾兩人受先帝命。守此土。自分死久矣。豈能復向賊求活。且吾兩人書生。猶義不為賊屈。公世臣。奈何賊未至輒降。他日何面目見祖宗於地下。吾兩人在印不可得。必欲印。請待吾兩人死。而後惟公之所為。天波不能答。而陰告永昌人曰。不降城且屠。永昌人洶洶。兩人因悉遣其家人。西走騰越。運開謂其弟曰。爾未仕。義不可死。其將吾妻妾俱西。勿令此輩在。徒亂人意耳。眾曰。集參議門哭且譁曰。明公固效死。奈滿城生靈何。參議慰之使退。乃又趨府署。譁如前。廷傑從容坐堂上。召之曰。來。吾語汝。逆賊說請他州縣之降。而屠者多矣。處亂世。生死有命。若何恐之甚耶。眾或前曰。人誰不畏死。廷傑笑曰。汝以吾為畏死耶。吾欲死久矣。乃命取卮酒。開篋投醪。將

飲衆大驚皆走。一夕運開過廷傑，相與語，臨別運開舉手曰：「吾熟思之，惟此一路宜走也。」廷傑曰：「諾。」衆有竊聽者，私相告且賀曰：「兩人走，我輩生矣。」旦日集衆，勸門視之，而見有老僕哭而出，往告廷傑曰：「吾主人夜半自縊死矣。」廷傑喟然歎曰：「嗟乎！君子哉！遂先我而死耶？」乃沐浴焚香，操上烈皇帝表，又賦詩四章以見志。既畢，以素練懸梁上，既縊，練忽絕，復甦。有客持之泣，廷傑叱曰：「去！復整衣冠，更以帛自縊死。」王運宏在騰越聞之，與劉氏子弟來治喪。既殯，復走騰越。兩人既死，沐天波使人攜印往降可望。可望陰遣將劉文秀引兵襲永昌，執天波以歸。可望既降天波，取永昌，聞兩人死節事，驚嘆良久，將求其後官之。或言運開有弟曰運宏，今在騰越，可試召之。乃發使召運宏，行至潞江中流，出手書一行，付其僕曰：「志之。」遂躍入江死。僕視其書云：「得我屍同吾兄合葬。」題曰：「夾江二王兄弟之墓。」數日，得其屍沙上，面如生，遂合葬之。可望還滇，自稱為平東王，鑄錢，曰：「興朝通寶。」營宮室，造印勅，設部寺臺省，侍從官浸尋自帝矣。而其黨故等夷不相下，每扼腕怒目相爭曰：「爾自王，誰實王之？」先是，烈皇帝之崩也，弘光帝南京未幾而敗，隆武帝閩越又敗，而兩粵間乃立桂王子永明王於肇慶，故元永歷。楊長知聞之，告可望曰：「君自王滇，南衆且不服。今明天子新立，廣東君能東身歸命，當得爵土之封。」衆無不服者。可望曰：「善。」即使長知朝行，在請王封

廷臣議不決。畏知再往返而帝拜畏知為學士。已而可望黨賈九義至。行在以封事與廷臣爭辨。擢殺宰相。嚴起恆。畏知深自悔恨。痛哭上書論九義罪。可望怒。使其黨鄭國執畏知。至。數之曰。何負我。畏知曰。爾負我。我負爾耶。吾兩人始約尊明。今明室秋毫未得爾力。始約勿殺人。今且殺大臣矣。盜賊終不可與有為。如此奮起。搏可望不得。乃取頭上幘。擲可望面。可望益大怒。遂殺畏知。於是召九義等。遣而訟言背叛。益驕蹇無忌矣。已而李定國卒破走可望。可望部卒多降明。本畏知始謀云。

贊曰。吾聞永歷帝之崩也。其骨煨且棄之於墟中。滇人相向悲泣。乃相率提篋於墟中。拾取之。軍中見之。感其意。各給以金錢。頃之錢滿篋。遂以葬其骨云。吾嘆滇人之義勇如此。而先是已有此四人者。嗚呼。烈矣。顧楊公所為尤極難耳。其志雖不成。而國家之祭統猶延於諸賊之手者。且十餘載焉。而畏知已前死久矣。吾又於奏封一事。深嘆永歷諸臣之不能用諸賊也。

西河婦在少女合傳

西河婦。浙江蕭山人。忘其姓氏。家於縣之西河里。其夫貧。不事生產。而嗜酒。其負酒家錢不貲。婦工刺繡。得直。輒沽酒以供夫飲。夫飲必醉。醉輒怒詈其婦。而婦無怨言。如此者且十餘年。一日其夫歸。笑謂婦曰。苦而終身。不能償余酒債。今日遣而就樂。

土此非汝家也探懷中出白金示之曰將以而身償所負婦曰吾十指供夫飯不足何惜一身時夫已醉大笑出門去婦藏刃懷中默然獨坐及昏有攜紅燈來一老嫗撫婦背曰速更衣婦起南面再拜不更衣疾趨就肩輿至所適之家眾女爭挑燈啟簾視之婦已自刎而死血淋漓滿身皆驚走縣城十里有桂山富氏世居山下力田煮海為生有女年及笄許聘聞氏將行而聞氏子暴卒女麻衣隨母往弔泣奠畢母欲攜女歸女曰女已歸復何所歸其舅姑私相語曰農家女安知守節且年甚少而能保其後之無悔乎復勸女隨母遷女涕泣不肯舅姑曰必不得已俟葬吾子而後歸耳於是母歸而女留久之卜葬有日兵女嚮其夫之兄曰葬具甯多為備及葬女至墳側視塚已封泣而祭之暮抵家家人謀乘間勸還母家頃之有童子云新人扁戶寂無聲姑疾趨叩戶不應從壁竄窺之見女縞衣懸梁間死矣時奠具頗有餘者明日令葬於其夫之穴

贊曰此二事吾聞之蕭山人毛季璉云蓋皆在康熙甲寅以後比有好義者聞於官請具狀旌表官方急催科且贖貨以事上官怒曰吾安能為此迂闊事縣人皆笑之居無何官以賢良徵入京尋為大吏